


# NKONKO NÈ MANDAMUNA

 Ncyèna mumanyè nè mpenyi to. Bàdi—bàdi pàmwápa, pângà apa, mbafwànyine kucifùndulula. Ncyambè nè: “Yeshàayi 4.24.” Mpindyewu, Yeshàayi 4 ùdi ànu nè mvensà yisambòmbò munda mwèndè, pa nàнку ndi . . . nènku ncyèna mumanyè ní udi muswè kwamba Yeshàayi 5.24 anyi to. Ùdi wàmba nè: “Dyumvwija dyà Mufùndu ewu didi cinyi, nè nebyenzekè díbà kaayi, Yeshàayi 4.24?” Kàdi Yeshàayi 4 ùdi nè mvensà yisambòmbò. Bu nwènu mwà . . . Yònsò udi mucifunde awu, bu wèwè mwà kwela meeji mpindyewu, pàmwápa, nè kucifùndulula cyàkàbidì, ndi mwà kufikakù, nudi numòna’s. Ncyèna mumanyè nè mpenyi paùvwà uleedila to: “Yeshàayi 4.24, dyumvwija dyà Mufùndu ewu didi cinyi nè ndìbà kaayi dyènzekàwu’s?”

<sup>2</sup> Mpindyewu, ncyakunùlama ntàntà mule to. Ndi nè . . . èyo, twasàkidila, mwanèètù. Nènku ndi nè—ndi nè ndambù wa myaba yà kuya, nè eci . . . Nudi bamanyè’s, mvwa ngèèla meeji, mvwa nè mufùndu kampànda kaaba aka, anyi, numfwilaayikù luse, mukàndà mumfundila kùdi Mukalenge Baxter. Nènku kumpàlà kwà twètù kubanga masangisha mu dindà emu, pa bwalu ebu, ndi mufwànyine—ndi mufwànyine kujinga bwà nwènu ku—kusambila pàmwè naanyi bwà katanci kakesè cyaanàna.

<sup>3</sup> Mvwa—mvwa mupàtuke mu masangisha nè majinga matàmbe bwìmpè bwà kuya mu—mu masangisha àanyi à dyàmwàmwà dyà mbù, ànu mu matùkù makesè àdi àlondà aa. Mpindyewu ndi mupete mukàndà mumfundila kùdi Mwanèètù Baxter, Mwanèètù Cox nguvwa muwùmbadile ku téléfonè makèèlèlè dilòlò awu nè muwùmpèèshe mu dindà emu, bwà nè bàdi munkaci mwà kuteeta bwà kuàpingaja paanyimà cyàkàbidì mpindyewu, cyàkàbidì. Nènku ncyèna—ncyèna mumanyè ní n’Sàtaanà munkaci mwà kuteeta bwà kumpangisha anyi n’Nzambì mwindile ànu bwà cikondo kwikalaci cijaalàme. Ncyèna—ncyèna mumanyè to. Mbaswè bwà kucyàluja paanyimà kakesè ndambù, nènku bàvwà ànu batùngùnùkè nè kucyàluja paanyimà kacya ku ngondo wa kaswà mansèense. Ngondo wa kaswà mansèense, ngondo wa kaswàbàngà, ngondo wa ciswà munène, ngondo wa cyongo, n’ngondo yàmba kutwà ku yinaayi mpindyewu yikaadibo bacyalùje paanyimà.

<sup>4</sup> Nènku mpindyewu cikèèna—kumòna ncilwè, ncyòci eci cifùnda mu Bible emu ànu menemene ciikalà mwà kwenzeka; kàdi ndìbà kaayi, ncyèna mumanyè to. Mpindyewu, nkàadi mwambile bantu ànu (nè diitabuuja dímpè) civwàbo bangambile mèmè, bwà kwikala badìlongòlòle mu cikondo eci.

<sup>5</sup> Mpindyewu bantu bàdi bèèla meeji, mûndi ngiitabuuja, nè ncyèna ànu nè meeji matòòke pa bwalu abu to: “Kaa, ncinyi. . . ndìbà kaayi dyàpetàye. . . Ndìbà kaayi dyàyàye?”

<sup>6</sup> Kàdi pàndi mpeta mikàndà eyi mimfùndila nè biikàle bàngambila nè: “Èè, kwèna ànu mwà kwanji kucyènta to, bikèngela *cikampànda* eci ciikale mwà kwenjiibwa, nè bikèngela bwà *cikansanga* ciikale mwà kwenjiibwa.” Dìbà adi ncyèna. . . Ndi—Ndi ndyùmvwà bibi, kumpàlà kwà bantu. Ncyèna mumanyè cyà dyenza to. Kàdi cintu cimwèpelè, nèngènzè eci, nè nwènù bônso pàmwè naanyi; nèngiikalè mwà kucilàmbula kùdi Nzambi, ngàmba nè: “Mpindyewu, Mukalenge, paŪdi mudilongòlòle, nè mèmè pàanyi.” Nwamònu anyi? Nènkù bu mèmè ànu. . .

<sup>7</sup> Míngà misangu mmaèkèleeziyà àdi kaayi à mu bulongàme to, mpindyewu mmikàndà yà vizà anyi cintu kampàndà cikwàbò. Nudi bamanyè’s, kùdi ànu bintu byà mùshindù awu. Cìdi mwà kwikala Sàtaanà ùteeta bwà kwenza nànkù. Pa nànkù patùdi munkaci mwà kusambila mu dindà emu apa. . . Nè musangu wònsò wùdi usambila munda mwà lumingu lujimà, wèwè—wèwè ùnsambidilèkù nè ùlombè Nzambi bwà. . . Cyòci ciikàle Sàtaanà, bwà kumuumushaYè mu njila. Nwamònu anyi? Nènkù cyòci ciikàle—nènkù cyòci ciikàle diswa Dyèndè, àndamèku mwab’ewu. Nwamònu anyi? Yèyè’s mmumanyè ànu menemene cyà dyenza. Kùdi mwà kwikala cintu kampàndà cikwàbò cidiYe ùnyungulukilakù, wènda ùlongolola cimfwànyi bìmpè. Kacya ncitu muswè kuMudyànjidila nànsha. Kaa! Paùdi wenza nànkù, mbwalu bukolè. Nwamònu anyi? Pa nànkù ndi—ndi ndyùmvwà ànu nè cidi. . . nè—ne cidi mwà kwikala. . . Ncyèna mumanyè nè cyà kwamba ncyèpi to, bwalu ncyèna mumanyè to.

<sup>8</sup> Ànu mùdi mwanèètù munanga, George Wright. Bààbúngi bàà kunùdi mbamanyè mùshindù wùdiye, kî mmòmù anyi? Kàdi’s nudi bamanyè nè bangàngàbukà bàvwa bamulekèle, bwà nè ùvwa nè cyà kwikala mufwè kùkaadi lumingu lujimà, anyi bipite apu, nwamònu’s, Mwanèètù George Wright. Mvwa mupweke mukamònàngàne nendè, nè pangààkapwekà kuntwaku ngàkasambila nè ngàkasambila nè meeji matòòke nè mwànyi pàanyi mònsò mùmvwà mumanyè mwà kusambila bwèndè amu. Ke pashùshe mèmè kwalukila kumbèlu nè kudikonka nè cìvwà mwà kwenzeka ncinganyi. Nènkù paanyimà pàà ndambù wa matùkù, èè, mvwa—mvwa mupetè cikhèna—kumòna mu dindà dyà mu òmwè dishààle, nè mwindile. . .

<sup>9</sup> Mpindyewu, kùdi—kùdi muntu mukàji kampàndà ùmvwà musambidile mwikàle nè kànsèrè, nè mèmè kumumòna mwimànè kuulu nè ùvwa—ùvwa nè. . . Bàvwa bamupandè, ùvwa mùlè tètè nè kànsèrè, è kumutelululabò. Nwamònu anyi? Kàdi neikalè nè mwoyi. Ndi mumanyè nànkù.

<sup>10</sup> Kàdi, mpindyewu, Mwanèètù George Wright, ncìvwa mupetè

cikèèna-kumòna citòòke menemene to. Mvwa ngènda ndwa. . . Cìkèèna-kumòna cimwècimwè aci, mvwa mpátuka nè mémè kumòna kaaba kèndè—kèndè, nzùbu wendè. Nènku ku luseke lwà dyà bakàji lwà nzùbu kùdì micì miimàne kuntwaku, mucì wà—wà saule, ànu lwà ku mwelelu aku mémè è kumònakù bitocì byà manyaanù, bìipacila bunène bwà ònkòmù dyànyì edi, byènda bìbùnguluka panshì. Ke mémè kuumvwa Mwanjèlò uvwa mwimàne ku luseke lwànyì awu, wàmba cintu kampàndà pa bìdì bitàngila lukità nè Mwanèètù George.

<sup>11</sup> Mpindyewu, cìvwa anyì eci, cìvwa ndukità lwà Mwanèètù George lùvwàbo munkaci mwà kumbula alu, anyì bimwèka kùndì bu. . . Mpindyewu, vùlukàayi mpindyewu nè, ncyèna mufwànyine kwamba eci. . . nè bu mùndì ngiitabuujà nè tudi nè ndongolwelu wa bìjikudi byà mèyì munkaci mwà kukwàta mudimu mwab'ewu, anyì ndongolwelu wa dikwàta dyà mèyì pa mikàbà's wè. Kàdì mpindyewu ndi muswè kucitòòkeshà, mùmvwà mubènzèle amu, ngèèla meeji nè cìvwa ncyòci eci. . .

<sup>12</sup> Kùvwa musumbà wà bantu kuntu kwàka munkaci mwà kumuseka bwalu yèyè ùdì wìtabuujà nè Nzambì neàmwondòpè paanyimà pàà ngàngabukà mumanè kwamba nè: “Yèyè ùdì ùsaama. Èè, kèna mwa kwondopiibwa to, nwamònu's, kaadibulu kàà mashi aku nkabwele mu bisulusulu byèndè, nè kàpàtula mashi, nè bikwàbò byònsò.” Yèyè nè: “Ànu kamata kakesè kàà kumpàlà kààbwela mu mwoyì wèndè anyì mu mutù wèndè, nèkàmucìbwilè panshì anyì nekàmushipè.” Nwamònu anyì? Pèndè mwikàle nè bidimu makùmi mwandamutekète nè bìbìdì, musambùke nè cikondo cimukòsela.

<sup>13</sup> Kàdì ndi ngiitabuujà nè cìvwa ncyòci eci, nè yèyè mmufwànyine kuumbula lukità lwà bàvwà bàmuseka abu, kuumbula lukità. Nènku mpindyewu, mémè ncìvwa mumanyè nè yèyè ùtu mumbudi wa nkità to, pèndè ke cidìye. Mémè, nwamònu's, pàmvwà ndyambidila aci apu, yèyè's ùtu ùmbula nkita, ke cidìye wènzà ncyòci aci. Nènku byàkamwèka ànu bu nè kùvwa cintu kampàndà pa bìdì bitàngila lukità kampàndà nè dyumbula dyà lukità, anyì—anyì cintu kampàndà cyà mùshindù awu, nè Mwanèètù George Wright.

<sup>14</sup> Ndi mulòmbè Mukalenge mpindyewu, kùkaadi malòlò matwè ku ànaayi, bwà kucingambulwila Yè bu Yèyè mwà kuswà. Cyàkalwa pa dībà bu mwandamutekète anyì mwandamukùlù nàнку awu mu dīndà kampàndà. Pa nàнку ndi mutwishībwe nè Yèyè neàcītòòkèshè. Kàdì ndi ngiitabuujà bulelèlè nè mwoyì wànyì wònsò. . . Mpindyewu, eci cidì ànu nè mvwa mubinge pangàakambà nè yèyè neùmbulè lukità bwà bàmwè bàà ku bàdì bàmuseka abu, bu mémè mucyùmvwà bimpè. Kàdì ncyèna mutwishībwe menemene bwà cyòci aci to. Cìvwa ncintu kampàndà bwà dyumbula dyà lukità, nè Mwanèètù George Wright. Ndi ngèèla meeji nè yèyè ùvwa nè cyà kumbula lukità lwà muntu kampàndà uvwa umuseka.

15 Mpindyewu, Nzambi ùdi dinanga, nè, kaa, tudi ànu bamunangè nè myoyi yètù yònsò.

16 Mpindyewu, mu dindà emu katwèna baswè kwangata dîbà dyètù dipitèpité búngì pa nkonko eyi to. Nènyandàmùnè ku dyànyì pàànyì dimanya. Mpindyewu, balundà bàànyì, ndi mwà kwenza bilèma byàbúngì be pa bintu ebi. Mémè ndi ànu—ndi ànu muntu mùdi bakwàbò bònsò bàà ku twètù amu. Nènku Mwanèètù Neville, anyì yònsò wa ku bambi bakwàbò aba, anyì bakwàbò aba, ùdi mwà kuyàndamuna ànu byà mwomùmwe nè mûmvwà mufwànyine kwenza. Kàdi, ndi ngèenza nùnkù mu kiipàcilà kampàndà, bwà kujandulakù mu mùshindù kampàndà cìdì mu myoyi yà bantu.

17 Nènku mémè mwà kumòna bànaayi anyì bàtaanu bèèlangana meeji pa cintu kampàndà, dîbà adi ndi ngèèla meeji nè: “Uh-oh, ke bwalu ebu’s. Mwaba, ndi mumanyè mwaba wunùdi nusanganyibwa mpindyewu, tukonko tukesè mu èkèleeziyà.” Nènku mpindyewu tûpwayi mwoyi tu—tukonko tukesè atu. Nè cintu cyà mushinga kumutù kwà byònsò nkulama èkèleeziyà mu dyumvwangana nè mu dinanga dyà Nzambi, nè kutùngunuka, bu twètù bònsò mwà kwitabuuja nè Mashi à Yesù Kilistò àdi àtùkezula ku mpèkaatù yònsò nè bubì bwònsò. Pìikalà mukàjì udi musòmbe ku luseke lwèbè awu, anyì mulùme udi musòmbe ku luseke lwèbè awu, pìikalàye kàyi wítabuuja nè Yesù ne—neàlwe cyà bushùwà mu mùshindù wà ùmwèka nè meesu kàbìdì, tùmvwanganàyi àn- . . . tuyaayi ànu kumpàlà mu mùshindù yònsò. Katwèna tupetangana nendè pa Mufundu to. Kàdi tûfikishàayi èkèleeziyà ku dikwàta mudimu mu dipetangana, bwalu mu dyòdi amu ke mutwàbàkulà bantu bakwàbò bààbúngì. Kàdi pàdì èkèleeziyà mupàtùke mu dyumvwangana, dîbà adi udi—udi wenzela èkèleeziyà bibì, dîbà adi udi wenzela kiipàcila kiinè bibì. Wèwè. . . cidi ànu. . . kwèna ànu mwà kucyènza to. Kàdi patùdì mwà kupetangana pa cintu cìmwèpelè, nè Mashi à Yesù Kilistò àdi àtùkezula ku mpèkaatù yònsò (ncyà bushùwà) nènku mpèkaatù mmumanè kuya, dîbà adi twètù tudi pabwìpi menemene nè kumbèlu dîbà adi, Mwanèètù Neville. Pàdì Mashi, patùdì Mash- . . .

18 Ndi nè mwanèètù wa balùme, tudi nè bulongo bwà mu mashi. Kàdi, èkèlekèle, mùshindù wutùdì katùyi tupetangana; uh, byènza nè luse. Kàdi, nànsha nànkù, tudi bànà bàà muntu.

19 Mpindyewu, mvwa ngèèla meeji ku lumingu elu, lumingu lùlwalwà elu, bu mémè ncìyi muyè dyàmwàmwà dyà mbù to, pàmwàpa. . . Mwanèètù Cauble kulwayè mwaba awu, nè kuswayè bwà kubanga kàmpanyè mu Louisville, nè kuswayè bwà kupeta Mwaba wàkulamina bingoma mutùvwà benzèle disangisha dyètù dikesè dyà dyondopa kuntu kwàka dilòòlò adi. Ke Mukalenge kwenza Yè bintu kampàndà byà dikèma. Nè pa nànkù. . . Kàdi pashìishe mémè kusangana nè bànà bèètù bàà ku Del Rio, mu Texas, bànà bèètù bàà Jessup abu, bàdi

munkaci mwà kwenza masangisha mu Louisville nè bàvwa nè mwakudi wabò wa dipòkò kuntu kwàka bwà mbingu yidi yilonda kumpàlà eku. Ke yêyè nè kàvwa ànu mumanyè cikondo cìvwaye nè cyà kuumuka to. Charles, ngèèla meeji nè mmwômò, aci neciikale lumingu lùdi lùlonda elu, nènku ncyà bushùwà nè ncìvwa mufwànyine kubanga ditàbuluja mwaba nànsha wùmwe nè kàmpanyè kàà mùshindù awu munkaci mwà kwenzeka to.

<sup>20</sup> Nè bàdi kàbìdi munkaci mwà kwenza kàmpanyè kàà dyondopa. Nè pa nàнку kàmpanyè kàà dyondopa aku kàdi mu mappingaja, mu mappingaja emu. Nè pa nàнку ncìvwa muswè kubanga disangisha kampàndà eku—eku bóbò munkaci mwà kwenza disangisha kuntwaku to, bwalu ndi mumanyè cìdici bwà kwikala mwaba kampàndà nè cidi ànu. . . Kaa, nudi bamanyè's, pàndi munkaci mwà kwenza disangisha nè muntu kampàndà ùtùpika uya muulu bwà kubanga kaadisangisha kakesè mùshindù awu. Kacyèna ànu cìmwèka cìmpè to, kacyèna cìcipeesha kaaba kajaalàme to, nudi bamanyè's. Pa nàнку netwindile ànu kwindila too nè pashiishe kakesè, pàmwàpa Mukalenge neàtwàmbùlwishè. Yèyè neàtwàmbùlwishè, nànsha bishi, nè pa nàнку tudi ànu twitabuuja nè tutùngunuka nè kwikala nè lulamatu kùdi Nzambi.

Mpindyewu túsambilàayi:

<sup>21</sup> Taatù wa mu Dyulu, mabènesha Èbè àkenkeshèku pambidi pèètù mpindyewu pàndi ntwàdija bwà kwandamuna ku nkonko eyi apa. Èyi Nzambi, ànu. . . Kùdi yimwè yà ku yóyi ayi mwab'ewu yindi nciyikù nànsha mwànji kutàngila to, nè kùdi ànu yibìdi anyi yisàtù yìndi mfù—mfùma ku dibala mu katanci kakesè emu. Ndi ndòmba, Taatù, bwà Wèwè kunkwàcisha nè kumpà lungènyi nè cyumvwilu, bwà ngaamònakù mwà kwamba ànu cidi cyà bushùwà. Enzàku nàнку, Taatù. Nè swàkù bwà mpetèku Lungènyi Lwèbè nè Nyumà Mwimpè àpwekèku ànu mpindyewu ewu nè àtùpèku lungènyi lùdi lùtùkèngela. Tùbènèshèku pàmwè leelù ewu, Mukalenge, pàdi kasumbù kakesè kàà tabernacle kàdi apa aka.

<sup>22</sup> Bèneshàku mwanèètù munanga wa mushinga mukolè, Mwanèètù Neville, ewu, Taatù, ùdi munkaci mwà kukwàta mudimu mukolè, mmudiishi wa mikòòkò yidi mu budimi ebu bwà cidìilu, udi—udi uteeta bwà kulombola mikòòkò mu lutende lubishi nè mu ndòndò wa bisoosà byà nyama, anyi pambèlu mu màyi nè pashiishe kuyàluja mu mundidimbì wà mucì, kàdi mwikàle ùkùba yidi mibèèdi nè mikèngeledi nè yà myànà mikesè yidi micibùkile panshi nè yidi mizengèle ayi nè ùteeta bwà kuyòndopa nè kuyitwàla, bwà kwikalayi mikòòkò milelèlè. Èyi Taatù, ndi ndòmba bwà Umubènèshè. Mupèeshèku lungènyi nè dimanya nè dyumvwa.

<sup>23</sup> Nènku tükwàcishèku bònsò pàmwè mpindyewu, Taatù, nènku netùKupè butùmbi. Mu Dìna dyà Yesù. Amen.

24 Mpindyewu, mu yimwè yà ku yìdì kaaba aka eyi, mèmè nênyipâtùlè, mvwa muyèlè mu bitùpà byà Mifundu mwaba wùvwàyi—mwaba wùvwà muyikùmbànyine. Nènku mpindyewu tudi tubanga ànu nè yimwè yà ku yôyi, nè kwenda kwandamuna too nè mutwikalà mwà kupeta—kupeta bungi bwònsò butwikalà mwà kufùdishà abu. Nè ndi ngèèla meeji nè tudi mwà kuyàngata yònsò, nè mèmè nêntabaleelè mwab'ewu bwà twètù kupâtuka kumpalà kwà dîbà.

25 Cintu cyà kumpalà ndukonko, ànu lukonko lwètù lwà buludì elu:

**8. Ngákabàtìijibwa pámwà nè bidimu dikùmi nè bisàtù. Bìvwa bìkèngela bwà mèmè kubàtìijibwa cyàkàbìdì anyì?**

26 Mpindyewu, aci's—aci's ndukonko lukesè lulenga be lwà kwela. Èè, mpindyewu, mulundà wanyì, ntu misangu yònsò ànu nshìila muntu yêyè mwine abu bwalu.

27 Vùlukàayi nè, ncyèna mumanyè...Kùdì kampàndà úndì mumanyè bimpè udi mulùfunde, ndwòlù lùdì mwab'ewu elu, nè muntu ewu mmulùmpèèshe yêyè nkàâyendè. Nè muntu kampàndà mmungeelè lukonko lwà paanyimà pàapa lùvwà lùkèngela bwà mèmè kwandamuna, kàdì kàvwakù mulùfunde pa dibèji to, ke mèmè kwamba nè: “Bu mèmè nè dîbà bungi bukùmbàne paanyimà pàa yôyi eyi nùnkù ndi mufwànyine kulwàdamuna.”

28 Kàdì mpindyewu elu elu: “Bìvwa bìkèngela bwà mèmè... Mvwa...”

**Ngákabàtìijibwa pámwà nè bidimu dikùmi nè bisàtù. Ndi nè cyà kubàtìijibwà cyàkàbìdì anyì?**

29 Pawikalà mwena Kilistò kubangila ànu kònsò aku, kacya paùcìvwà nè bidimu dikùmi nè bisàtù, mwena kwitabuuja mu Kilistò, Ndi—ndi mufwànyine kushààla ànu cyùdì aci. Ncyèna mufwànyine mpindyewu, piikalàbi nè Nzambì mmùkubènèshe nè mukupèèshe Nyumà Mwímpè kubangila ànu cikondo aci.

30 Nè dibàtiiza didi ànu mmwè—mmwè—mmwènekelu, cidi ànu bwà—bwà kuleeja kùdì bàà pa buloba (anyì disangisha dyùdì—dyùdì naadi pa dîbà adi) nè wèwè, kumpalà kwà bantèmù, ujaadika nè wèwè udi mwitàbùùje nè Nzambì mmutùme Mwan'Èndè nè Yêyè wàkafwà nè wàkabiika ku lufù mu ditùkù diisàtù, nè wàkajiikiibwa munda Mwèndè nè wàkabiika ku lufù bwà kwendela mu bupyabùpyà bwà mwoyi. Nè bantu bàmwèbàmwè bàakakutàngila pawàkabàtìijibwà abu nebàtwilàngàne neebè ku Cilumbulwidi. Wamònu anyì?

31 Nè pashìishe, bu muntu kampànda (mwenyi) mwà kwamba nè: “Uvwakù mubàtìijibwe anyì?”

32 “Èyowà, mvwa mubàtìijibwe pàmwè nè wanyì... mu lufù nè dijiikiibwa dyà Mukalenge wanyi.”

<sup>33</sup> Nwamònu's, ndi ngèela meeji nè dibàtiiza adi... Kaa, ndi ngàmba cyà bushùwà nè ndyà mushinga munène, ncyèna muswè kwamba nè kî ndyà mushinga munène to. Kàdi ndyà mushinga munène bwalu dîdi... Dîyî ditùma dyònsò dyà Nzambî didî nè mushinga munène. Kanwènaayikù nwela meeji nànkù anyî? Bîdi byà mushinga munène bwà twètù kubàtijiibwa. Yesù wàkafila dîyî edi mu Maatàayi Munsantu, anyî Maakò Munsantu 16, Yèyè kwamba nè: "Ndàayi pa buloba bujimà nùkayiishè Èvànjeeliyò, ewu udi witabuujà nè ubàtijiibwa neàsungidiibwè." Nènku pavwàYe wàkula nè Nikòdemè apu, Yèyè kwamba nè: "Muntu yèyè kàyi mulediibwe kùdî mâyi nè kùdî Nyumà to kàakubwelakù to nànsha byà munyi." Nwamònu anyî? Cidi nè cyà kubàtijiibwa. Mèmè ndi ngiitabuujà diinyijangana dyà mu mâyi, mu dibàtiiza, mu Dîna dyà Mukalenge Yesù Kilstò, nè kubiishiibwa cyàkàbîdî mu bupyabùpyà bwà mwoyi, bwà kwenda bilondèshile Méyi matùma à Nzambî.

<sup>34</sup> Kàdi, wèwè udi wamba nè: "Mwanèètù Bill, kacya ukàadiku mubàtiize muntu kampàndà cyàkàbîdî, ukàvwakù mubàtijiibwe pàcivwàye mwànà mutekète nè pashiishe kubàtijiibwayè cyàkàbîdî anyî?" Misangu yàbùngî.

<sup>35</sup> Kùdî—kùdî Mufundu mu Bwàkabuulwibwà mwàmwa, nshapitá mwi2, mwikàle wàkula nè èkèleeziyà, Yèyè nè: "Nyingàlàlaayi nè enzùlùlaayi byenzedi byènù byà dyàmbedi abi cyàkàbîdî." Nè bààbùngî bàtu bùmvwija Mufundu awu nè ùdî wàmba nùnkù, nè ùdî ùmvwija nè bìvwa bikèngela bwà wèwè kwalukila cyànyimà nè kwenza cintu cimwècimwè aci kàbîdî. Èè, bu wèwè mwà kumòna, wèwè mulundà wanyî mwena Kilstò munanga... .

<sup>36</sup> Mpindyewu, ncyèna mbèngangana nè eci mpindyewu to, nwamònu's, bwalu tudi nè ciina cyà mâyi à dibàtiiza cyùle tètè. Tudi badilongòlòle bwà kubàtiiza muntu kanà yònsò udi muswè kubàtijiibwa díbà kanà dyònsò. Kàdi twètù katwèna tubèngangana to. Wèwè muswè kubàtijiibwa, pìikalàci ke cintu kampàndà cidi cikwimànyine mu njila webè nè wèwè udyùmva nè udi muswè kubàtijiibwa, ndà ùkacyenzè. Mbìmpè. Ndà ùkacyenzè. Kùlekedî cintu nànsha cimwè cikujika mu njila webè to, wèwè dikezùle mu mùshindù mupwàngàne.

<sup>37</sup> Byenze ànu bu nè—bu nè wèwè uvwa mwangàte cintu kampàndà, kùkaadi bidimu, nè mwikàle udyùmva bu nè bìvwa bikèngela wèwè kuya kalongolola cyòci aci, ndà ùkacìlongòlòlè. Nànsha bàcyàmba nè ncinyi. Wèwè tòokeshà bintu byònsò tòò. Bwalu nèukafikè too nè ku cintu aci, nè kwèna mwà kuya kule kupita paùdî kuyi muumùshe cintu aci mu njila to, udi umòna's. Udi ànu nè cyà kweyeka bujitu bònsò ku luseke nè bintu byònsò bìdî bikujìngila mu mùshindù mupepèle abi.

<sup>38</sup> Nènku wèwè muswè kubàtijiibwa cyàkàbîdî, tùngunukà

ùkacyènzà, ke cintu cyà dyenza ncyôci aci. Nkàadi mubàtiizùlùle bàábúngì be.

<sup>39</sup> Kàdi mpindyewu ku Mufundu wùdì wèwè uleedila awu, kawùvwa wákula bwà muntu nkàaya to, awu wùvwa bwà èkèleeziyà kampàndà. Nwamònu's, èkèleeziyà, civwàbo benzè, bàvwa bajimije dinanga dyàbò dyà kumpàlà, nwamònu's, máfutà à cyà bushùwà àvwàbo naawù ku cibangidilu awu. Ki Yèyè kwamba nè: “Ànu nwènù banyingàlale nè bènze byenzenedi byà kumpàlà ebi kàbìdì,” bangàayi dyàkàmwè kwalukila cyànyimà nwàngatè cintu aci. Ùdì wákula nè èkèleeziyà nè: “Ànu wèwè munyingàlale nè mwalùkile cyàkàbìdì,” èè, dìbà adi, Yèyè ùvwa nè cyà kuumusha citèekedi cyà mwèndù.

<sup>40</sup> Kàdi wèwè muswè kubàtijiibwa, nè wàkabàtijiibwa paùvwà nè bidimu dikùmi nè bisàtù, anyi ní mbidimu búngì kaayi, mòna's, wèwè—wèwè bàtijiibwe cyôci ciikàle cìkwimàna mu njila.

<sup>41</sup> Kàdi mpindyewu bwà kwamba nè bilondèshile Mifundu ndi mufwànyine kwamba nè bìvwa bikèngela bwà wèwè kubàtijiibwa cyàkàbìdì, kùdi mùshindù ànu wùmwèpelè wùdì mulondàngàne nè Mifundu wùndiku mwà—wùndi mwà kumanyisha wùvwà bantu babàtijiibwe cyàkàbìdì. Kùdi Mufundu ànu wùmwèpelè mu Bible mujimà emu wà nè bantu bàakabàtijiibwa cyàkàbì, nè abu mbàvwà babàtijiibwe kùdi Yone Mubàtiji kumpàlà kwà Nyumà Mwímpè kulwaYè. Pòlò, mu Byenzenedi 19.5, wàkabàmbila nè bìvwa bikèngela bwà kubàtijiibwa cyàkàbìdì mu Dìna dyà Yesù Kilistò, bwà kupetabò Nyumà Mwímpè. Nwamònu anyi?

<sup>42</sup> Mpindyewu—mpindyewu, kabyèna bikèngela bwà wèwè kubàtijiibwa bwà kupeta Nyumà Mwímpè to, bwalu udi mwà kwakidila Nyumà Mwímpè pàdì mwoyi wèbè mujaalame. Nwamònu anyi? Bwalu, mu Byenzenedi 2, Peetèlò wàkafila njila kampàndà wa kulonda bwà—njila kampàndà wa kulonda bwà “Kuningalala, nè kubàtijiibwa mu Dìna dyà Yesù Kilistò, nènku nenùpetè kupà kwà Nyumà Mwímpè.” Kàdi pashiishe, mu Byenzenedi 10.49, Nzambi kukùdimuka è kupèeshayè bàà Bisàmbà byà bendè dibàtiiza dyà Nyumà Mwímpè kumpàlà mene kwà kubàtijiibwabò mene. Nudi numòna anyi? Pa nànkù, nudi numòna's, cilumbù ncyà ngiikàdilù wa mwoyi wèbè awu.

<sup>43</sup> Pashiishe Peetèlò kwambayè nè: “Tudikù mwà kukàndika màyi anyi, bu mùdìbì nè bòbò aba bàkaadi bapetè Nyumà Mwímpè mutùvwà bamupetè ku cibangidilu amu?” Nudi numòna anyi? Nànkù dìbà adi yèyè—yèyè wàkabènzeja nè bàvwa nè cyà kubàtijiibwa mu Dìna dyà Yesù Kilistò.

<sup>44</sup> Pashiishe Pòlò, mu Byenzenedi 19, mmwambè...Pòlò, mumanè kupicila mu nseke mitùmbùkè yà Efesò, wàkasangana bayiidi kampàndà, nè wàkabàmbila nè: “Nukàadi bapetè Nyumà Mwímpè kacya nwítabuujà anyi?”

45 Bòbò nè: “Katwèna bamanyè ní...katwèna bamanyè nè Nyumà Mwimpè utukù to.”

Yèyè nè: “Nwàkabàtijiibwa mu dibàtiiza kaayi?”

Bàvwa babàtijiibwe. Bòbò nè: “Twàkabàtijiibwa kùdi Yone.”

46 Yèyè nè: “Yone wàkabàtiiza bwà kanyinganyinga, wamba nè ‘Bivwa bikèngela bwà nwènu kwitabuuja Yèyè ùlwàlwa,’ bu mu Mukalenge Yesù Kilistò.” Nènku pààkumvwàbo cyôci eci, bààkabàtijiibwa cyàkàbidi mu Dîna dyà Yesù Kilistò. Nwamònu anyi? Pa nàнку aci cidi... .

47 Mpindyewu, pa cyôci eci, cidi...Kàdi ànu kwamba cyanàana nè uvwa mubàtijiibwe mu dibàtiiza dyà bwena Kilistò paucivwà nè bidimu dikùmi nè bisàtù, nè uvwa musòmbe nsòmbe lu wa bwena Kilistò kònsò eku, anyi pawikalà mutwè cimpingà misangu mikesè... .

48 Ncyèna mumanyè ní bàvwa nè...mu ditwà dyà cimpingà, mùmvwà ngèèla meeji nè: “Mvw’a kujinga nè muntu kampànda ùvwaku mwà kwikala...ùvwaku mwà kunkonka cyôci aci.” Kàdi pa bidì bitàngila ditwà dyà cimpingà, vùlukàayi nè, udi utwà cimpingà ditùku dyònsò, kakwèna mùshindù wà wèwè kupanga kucyèna to. Mmómò. Kàdi wèwè udi utwà cimpingà kumpàla kwà bantu ku èkèleezi-... , kàdi kí nkumpàla kwà Nzambi to. Nwamònu anyi? Wèwè udi utwà cimpingà pa Kilistò, kàdi kwèna utwà cimpingà pa Nzambi to, ‘bwalu, bu wèwè mwà kwenza nàнку, paùdì wenza mpèkaatù, kwèbè nkujikè. Kàdi udi ànu wenda ukùluka ku musangu nè ku musangu. Bivwa bikèngela bwà Pòlò àfwe ditùkù dyònsò. Ncyà bushùwà anyi? Bivwa bikèngela bwà Yèyè kufwà ditùkù dyònsò, kunyingalala ditùkù dyònsò, nè kunyingalala dîbà dyònsò. Nwamònu anyi? Nènku piikalàbi nè bivwa bikèngela bwà Pòlò énzè nàнку, dîbà adi’s nebikengelè bwà mémè kucyèna, pàanyi’s. Kàdi wèwè? Ncyà bushùwà. Pa nàнку tudi... .

49 Kàdi mpindyewu, pawikalà—pawikalà wèwè nè uvwa mupikùdiiibwe nè umvwa nè—nè Mashì à Yesù Kilistò àkakukezula ku mpèkaatù, dîbà adi ndi—ndi...nè wèwè musòmbe nsòmbe lu wa bwena Kilistò, ncyèna—ncyèna mufwànyine kwela meeji nè bìdi bìkukèngela kubàtijiibwa cyàkàbidi to. Kàdi wèwè muswè, èyo, nebùikalè bîmpè, netwikalè nè disànkà dyà kucyèna.

50 Mpindyewu kabèji kakesè kàdi muntu kampànda mumpèeshe paanyimà pàapa nkòkù aka:

## **9. Mmwaba kaayi wikalà èkèleeziyà mwà kusanganyibwa piikalà Èvanjeeliyò mwà kwalukila kùdi beena Yùdà?**

51 Mpindyewu, muntu udi mwenze cyôci eci awu, ùvwa ùleedila apa ku Luukà, kùdi...Wa—wàngambidì, mwanèètù wa balùme awu, bwà nè ùvwa ùleedila ku mwaba ùvwàCi cyàmbè nè: “Bàà—bàà Bisàmbà byà bendè nebàdyatakajè ku makàsà bimanu byà

Yelusàlètà too nè pààjikà cipungu cyà bàà Bisàmbà byà bendè.”  
Aci mmu Luukà 21.24. Mpindyewu tèèlejàayi nè ntèmà yònsò nè  
eci cìdi mwà kulwàndamuna. Lukonko lulenga be! Lulenga be!

*Nè panwàmòna Yelusàlètà munyùngulukila kùdì  
bilwilu, díbà adi nùmanyè nè kabùtù kèndè kàdì  
pabwìpì.*

<sup>52</sup> Mpindyewu, tùmvwaaayi eci bîmpè mpindyewu. “Kabùtù aku  
kàdì pabwìpì panùdì numòna Yelusàlètà munyùngulukila kùdì  
bilwilu.” Mpindyewu, aci’s cívwa cibwejàkàjì búngì cyaanáà  
ànu mwinè mwaba awu, nè bantu bàdì mu. . . Kàdì kusemena  
naaci pabwìpì ku mmwènenenu wa maalu-malonda nè Bible.

<sup>53</sup> Mpindyewu, bânà bèètù ba-Adventistes, bânà bèètù  
ba-Adventistes du Septième Jour, bàdì bìitabuuja nè—nè  
Yelusàlètà neikalè munyùngulukila kàbìdì kùdì bilwilu. Èè,  
mpindyewu, aci cívwa mwà kwikala cilelèlà, bwalu Mifùndu  
yìdì nè nguumvwilù pàbìdì misangu yàbùngì.

<sup>54</sup> Nènu mbanganyì bàdì bamanyè nè Mufùndu wùdì nè  
nguumvwilù pàbìdì bwà cipròfetà cyònsò? Ncyà bushùwà bìdì  
nàнку’s! Èyowà’s, mukalenge. Necicyàmbè nè cyùmwiya ànu  
nàнку menemene too nè pa díbà *edi*, nè kunyùnguluka ànu  
buludi nè kucyènzulula cyàkàbìdì *mwab’ewu* mwaba kampàndà.  
Nwamònu anyi? Bu mùdì. . . Nènu nèndeedilè ku wùmwe wà  
ku yòyi bu mèmè mwà kwela meeji ku cyòci eci lùkàsà. Kaa,  
èyowà’s, ke mukwàbò ewu mu Luukà emu. . . Mu Maatàayi  
2, mbambè nè: “Nè Yesù wàkabiikidiibwa bwà kupàtuka mu  
Èjiipitù bwà kuujiibwakù cyàkaakulàbo kùdì mupròfetà aci,  
wàmba nè: ‘Wanyi. . . Ndi mubiikile mwan’Àanyi wa balume bwà  
kupàtuka mu Èjiipitù.’”

<sup>55</sup> Mpindyewu, cipròfetà aci, cileedila mwaba awu kùdì  
mupròfetà, cívwa menemene cileedila kùdì *Izàlèlèlà* (uvwa  
mwànà wa Nzambì) wàkabiikilaYe bwà kupàtuka mu Èjiipitù  
awu. Ncyà bushùwà, mu—mu Genèsè, mu Ekèsòodè. Kàdì  
cívwa—cívwa cileedila ku—kuntu kwàka, kàdì cívwa munkaci  
mwà kwenzeka cyàkàbìdì. “Pambèlù pàà Webè. . .” *Izàlèlèlà*  
ùvwa mwànà wa Nzambì. Aci’s nudi bamanyè. Wàkambila  
Pàlò, kwamba nè: “Wèwè. . .” Yèyè nè “Wèwè—wèwè. . .”  
cyàkenzelàye mwan’Èndè wa balume aci, bwà nè Ùvwa mwà  
kwangata mwoyi. . . Yèyè kàvwa muswè kulekela mwan’Èndè  
awu ùya to, pa nàнку Pàlò. . . Nzambì wàkangata mwànà wa  
Pàlò ku. . . nè. . . anyi mwanjèlò wa lufù dilòòlò adi. Pa nàнку  
cìdì nè nguumvwilù pàbìdì.

<sup>56</sup> Nè pa nàнку, mpindyewu, bu mùdì Yelusàlètà,  
munyùngulukila kùdì bilwilu, kàdì, ànu mu bushùwà bwà  
bwalu, bilondèshìle maalu-malonda, apu tuvwa bu mu  
cidimu cyà 96 paanyimà pàà lufù lwà Kilistò pààkakwàta  
Tiitùs Yelusàlètà. Kàdì mpindyewu tàngilàayi eci nè ntèmà  
yònsò, nudi mwà kumòna bishiilàngàne, ndi ngiitabuuja nè

Yelusàlemà neikalè munyungulukila kùdi bilwilu cyàkàbidi ku ndekeelu kwà cikondo. Kàdi ndi ngitabuuja nè eci nunku cìvwa cifwànyikijibwe nè dicincimikiibwa dyà pàvwà Tiitùs mucicincimike, cikondo cyà dikènga dyàci dikolè.

57 Mpindyewu: “Kabùtù,” wàkula...mpàvwa Danyèlè, mupròfetà... “kiimàne mu mwaba wà Cijila.” Mònaayi nè, yèyè wàkamba nè: “Panùdi numòna cinyangu cidì cìfila dibùtuka ciimàne mu mwaba wà Cijila.” Nwamònu’s, “cinyangu,” *cinyangu* “nkukooyika’s.” “Cidì cyèenza dibungama,” *kubungama* kùdi kùumvwija “kuyangakaja,” kùdi kùumvwija “kubùtula.” “Paùdi umòna cinyangu cidì cìfila kabùtù ciimàne mu mwaba wà Cijila,” cyàkuujibwa bilondeshilàngane nè mifundu pàvwà Tiitùs mucicincimike Yelusàlemà, mukwàte bi... .

58 Ku ntwàdijilu kwà nshapità ewu kùvwàbò bàMukonka nè: “Cikondo cyà nshikidilu neciikale dībà kaayi? Nè mbinganyi bìikalà bimanyinu byà dilwa dyà...dyà Kilistò?” Nèku bààkaMwambila bwà ntempèlu, mùshindù wùvwàye, mùshindù wùvwàye mulengeja nè mabwe manène nè bikwàbò.

59 Yèyè nè: “Nekùlwe cikondo ciikalàku kakùyì kùshààla dibwe nànsha dimwè pamutù pàà dikwàbò to, bwà nè ewu neàshimbudiibwe.” Yèyè wàkabanga kubàpèesha bimanyinu nè maalù à kukèma. Pashiishe, Yesù wàkula mpindyewu, ùkùdimuka mpindyewu kùdi Danyèlè, bwà kuuja, bwalu cipròfetà cyònsò cidì nè cyà kunwangana eci nè cikwàbò. Mufundu mu kaabujimà kī mmunyangàkàjibwe mwaba nànsha wùmwè to.

60 Yesù wàkamba nè: “Mifundu kayèna mwà kunyangakajiibwa to.” Amen. Nèku mwaba awu... .Nyààya mu Dyulu anyi anyi? Cyà bushùwà, ndi nya’s! Mifundu kayèna mwà kunyangakajiibwakù to. Bwènù nwènù bàdi kanùyì nwitabuuja bimanyinu nè bishimà nè maalù à kukèma, mmunyi munùdi bafwànyine kutàpulukangana nè Mufundu awu? Mifundu kayèna mwà kunyangakajiibwa to, ànu mùdibi nè Kilistò kènàku mwà (lwà kuulu eku), kènàku mwà kuumushiibwa to. Ànu mùdi mubidi Wèndè munène awu muulu amu, nè dinyungakana dyònsò dyà mubidi Wèndè didi dileeja dinyungakana pa buloba apa, bìdi nè cyà kwikala nànku. Dībà adi pìikalàbi nè Kilistò... .pìikalà wèbè... .dyondopa dyà kùdi Nzambì, bukolè bwà Nzambì mbumùshiiibwe ku èkèleeziyà mulelèlè, anyi èkèleeziyà wa nyumà pa buloba apa, dībà adi mbumùshiiibwe kùdi Kilistò. Yèyè kàcyèna kàbidi... .

61 Kàdi, kaa, ncimfwànyì kaayi cyà Mwonji wà mvinyò mulelèlè mwaba awu, nè twètù tudi matàmbà mu Mwonji wa mvinyò awu. Nwamònu anyi? Ànu mùdi Mwonji wà mvinyò ùnyunga amu, ke mùdi kàbidi matàmbà ènda ànyunga. Ncyà bushùwà anyi? Mùshindù mwìnè wùdibi bilenga bilayà bwà mubidi Wèndè munène awu’s wè, kaa, mabòko Èndè manène azòlologa mashi

awu nè binsònjì bìmata, nè mbadi Yèndè yà yìmata mashi ayi, nè nyimà Wèndè mujuula mibùndàbùndà mulembèlèlè pa buloba nùnkù ewu pankacì pàà Nzambì (Taatù awu) nè bàà cifwàkà bàà pa buloba ebu, ùbààkwila nè ùbànanga ànu mùdì mubidi Wèndè ùbwela mu dinyungakana nè bukolè, mbifidiibwe mu Èkèleeziyà.

<sup>62</sup> Ànu mwàkambàYe nè: “Nényungishè byanza byànyì mu nùnkù ewu,” nè mubidi Wèndè mwena diinà ùnyungakana. “Ndà eku ùkayiishè Èvànjeeliyò,” neùmònè Èkèleeziyà awu ùtentemuka buludì. Bwalu, bìdi bikèngela bwà mundidimbì wànyì unyungè pàmwè nè cyanza cyànyì. Amen. Ncyà bushuwà anyì? Amen. Kaa, ekèlekèlè, pàndì ngèlè meeji ku cyòcì aci’s we! Ki bwalu mbwòbù abu’s, Mubidi Wèndè munkacì mwà kunyunga: “Ndàayi pa buloba bujimà, nùkaleejè Bukolè patòokè.” Nànsha twètù banyeemene ku tèlòlòjì wetù ewu nè malongesha nè bikwàbò byà mùshindù awu, tudi tupangila byà byènza mwadi. Kàdi mpindyewu cyanza cyà Nzambì cidì munkacì mwà kukwàta mudimu, bimanyinu nè maalu à kukèma bìdi bimwènèka. Mòna’s, ekèlekèlè!

<sup>63</sup> Yesù ngwàkamba, kuntwaku pàvwàYe wipata badémons. . . Mpindyewu, kí nkupàtuka mu lukonko elu to, ànu bwà katanci kakesè cyanàànà. Kàdi Yesù wàkamba, pàvwàYe wipata baadémons apu, Yéyè wàkamba nè: “Bànà bèènú balela bàdi bàyipata ku cinyi? Pangìikalà Mémè ngiipata badémons nè munu wa Nzambì, bànà bèènú balela bàdi bàyipata ku nganyi? Nwènú nè ngenzèlù mutàmbe bwímpè, túleejàayi.” Nwamònu anyì? “Pangìikalà Mémè ku munu wà Nzambì. . .” Amen. Anjì elàayiibì ànu meeji, “munu” wà Nzambì awu. Kàdi’s ke Nzambì awu kumutù kwà Kilistò; Kilistò kumutù kwà èkèleeziyà. Ke Nzambì nyàwù, Taatù awu, wàmba cintu *kampàndà*; pashiishe Nzambì, Mwànà, unyungisha cyanza Cyèndè nè mundidimbì wènda ucilonda. “Piikalàbi Mémè ku munu wà Nzambì ndi ngiipata badémons, bànà bèènú balela bàdi bàyipata ku cinyi?”

<sup>64</sup> Tàngilàayi, ndi muswè bwà nwènú kumòna. Kaa, nànsha bàmba nè disaamà ndinène bishi anyì cinyongopelu cidì dyabùlù mutèke pambidi pèèbè, bikèngela ànu munu Wèndè cyanàànà bwà kucyùmusha. Kaa, ekèlekèlè! Ekèlekèlè! Tàngilàayi ànu makaaya manène nè mabòko nè mapùndà awu. Ànu munu Wèndè cyanàànà wùdi wùmusha disaamà dyònsò nè wipata badémons. Nènku dyabùlù nkantu kakesè kaayipu’s wè! Yéyè ùdi wàngata ànu munu Wèndè nè ùmwipata mwaba awu díbà adi. “Piikalàbi nè Mémè nè munu wà Nzambì. . .”

<sup>65</sup> Mpindyewu lekèlaayi nnùleejèku ndambù wa dinanga dyà Nzambì. Kàdi pàvwà mùkòokò mujimine, Yéyè kàakakwàta mudimu nè munu Wèndè to, Wàkawutèèka pa makaaya Èndè, nè Wàkangata Bumùntù Bwèndè bwònsò nkòong, wàmbula, mùkòokò pa makaaya Èndè. Citùpà cyà muntu cidì citàmbe bukolè, cyà makàndà matàmbe mpa makaaya èndè nè nyimà.

Nudi bamanyè aci. Bwalu mapùndà ônsò à mabòkò Èndè nè mapùndà àdi àpàtùka, ke Yèyè kwambula mùkòòkò mujimà awu; kuMutèèka pa dikaaya Dyèndè kàdi's ke Yèyè ulwàlwa ewu, kî nnè munu Wèndè to, bwà kwipata démon mukesè, wa kale awu to, kàdi's ke Yèyè ulwàlwa ewu nè Wèndè. . . mapùndà Ènde ônsò à mukòlò Wèndè awu, mapùndà ônsò à dibòkò Dyèndè awu, ùtememuka ùpicila mu cipèèlà, mwambùle mùkòòkò pa dikaaya Dyèndè. Kaa, ekèlekèlè! “Pangìikalà Mémè nè munu wà Nzambì ngiipata badémóns, bânà bèènù balela bàdi bàyìpata ku cinyi?” Kaa, àlèluuyàh! Ekèlekèlè!

66 Èyo, twàlukilàayi ku cyena-bwalu aci:

Kàdi panùdì. . . numòna Yelusàlèma munyùngulukila kùdì bilwìlu, . . .

*Dìbà adi aba bàdi mu Yudàayi banyeemenè ku mikùna; nè aba bàdi munkaci mwèndè aba kabàpàtuki pambèlu to; nè lekèlaayi. . .aba bàdi mu ditùnga bàwèlè. . .mu.*

*Bwalu aa neikalè matùkù à—à busombwedi, bwà bintu byònsò bìdì bifùndùbwe kukùmbanabi.*

*Kàdi dyàkabi kùdì aba bàdi nè mafù, nè kùdì bàdi baamusha, mu matùkù awu! bwalu nekwènzèkè dikènga dinène mu ditùnga, nè ciiji cikolè pa bantu.*

*Nè nebàponè ku lusongo lwà mwelè wà mvità, nè nebàye naabò mu bupika mu matùnga ônsò. . .*

67 Mònaayi mùshindù wùdì Mufùndu mulenga menemene mwab'ewu bwà kucipàtula cintu nè cintu. Cintu cyà kumpàlà nè: “Ku lusongo lwà myelè yà mvità.” Wa ndekeelu ewu neikalè ku bômbè bwà mushindà. Nwamònu anyi? Kàdi eci's nku lusongo lwà mwelè wà mvità, nè bivwa bikèngela bwà beena Yudà kulombodiibwabò kuya kule mu bupika mu bisàmbà byònsò. Kabyàdyàkwikala mùshindù awu kàbìdì to, nebàsangishiibwè mu Pàlèstinà bwà musangu wà ndekeelu. Nwamònu anyi? Eci cìvwa cileeja matùkù àkaadi mapite. Nènku aci's cidi ànu menemene bilondèshìle maalu-malonda, cyenzèke ànu mùshindù awu.

68 Bàakaya naabò mu matùngà ônsò. Ditùngà nè ditùngà dyònsò mwînshì mwà Dyulu leelù ewu, nudi nusanganamù beena Yudà. Kaa, ditùngà nè ditùngà dyònsò! Wèwè muyè ku Chine, kàdi's udi usanganakù beena Yudà. Wèwè muyè mu Russie, udi usanganamù beena Yudà. Ndàayi ku tuubisanga tukesè aku, nudi nusanganakù beena Yudà. Batangàlàke munkaci mwà ditùnga nè ditùnga dyònsò! Ncinyi aci? Ncipròfetà cyà Nzambì. Nzambì nguwà nè meeji à kucyènza. Nè bôbò beena Yudà abu mmakunji à njila, mwanèètù. Panùdì nubàmòna. . .

69 Ndi mumanyè nè mbampòfo nè bapàmbùdùbwe, nè baseeswisha nè bikwàbò byònsò, kàdi bàvwa baseeswisha kùdì

Nzambì bwà wêwè nè mémè twamòna mwà kupeta lumònù. Ncyà bushùwà. Kàdi nêngàmbè nùnkù mu nyumà wa cipròfetà, ku Bible, nè, dîbà dyà beena Yudà bwà kwalukila kumbèlu dikaadi pabwîpi. Èyowà's, mukalenge. Wàkapapisha mwoyi wà Hitler, kubiipatayè mu Allemagne; kupapisha mwoyi wà Mussolini, kubiipatayè mu Russie. Ùdi munkaci mwà kubiipata mu myaba yònsò, mwàkenzàYe mu matùkù àkabàpatulàYe amu. Nè pashiishe pàakapàtukàbò nè kubwelabò mu cipèèlà mwàmwa nè biikàle pabwîpi bwà kusambuka dyàmwàmwa, cyàkenzekà ncinyì? Nzambì wàkatuuta ditùnga adi nè bipupu binène nè bikwàbò. CìkalàYe nè cyà kwenzulula cyàkàbìdì nè basadidi Bèndè bàbìdì, micì yà olèvà yìbìdì yà Yèhezèkèlè nè yà mu Bwàkabuulwibwà 11 kàbìdì ayi. Yèyè neénzululè bimanyinu abi nè maalu à kukèma.

<sup>70</sup> Tàngilàayi bantèmù bàbìdì mu Bwàkabuulwibwà 11 abu nè: “Nèmfilè bukolè kùdì bantèmù Bàànyì, nè bôbò nebàkangè maulu mu matùkù à cipròfetà cyàbò awu, anyì nebàtumè bipupu pa buloba bu mùdìbo baswè.” Ki bwalu mbwòbù abu's, bantèmù bàbìdì abu mu matùkù à ndekeelu.

<sup>71</sup> Ndi mumanyè nè dilongesha dyà cyena leelù didi dyàmba nè aci “Ke Dipungila Dikùlukulu nè Dipyadìpyà ndyòdì adi.” Aci's ncyà mashimi! Aci's ncyà mashimi!

<sup>72</sup> Kì mbantèmù bàbìdì to, aci kakùyì mpatà to ndyalukila dyà Mòsà nè Eliyà. Kàdi tàngilàayi kale wàwa, nànsha umwe wabò . . . Mòsà, yèyè wàkafwà, kàdi wàkaya penyì? Ùvwa nè cyà kubiika cyàkàbìdì. Nè Eliyà wàkatentemunyiibwa mene kàyì mupicile ku lufù to. Nebikèngelè bwà kufwàye, bwalu muntu yònsò wa cifwàkà ewu ùdi nè cyà kufwà, pa nànkù nebikèngelè bwà yèyè kwalukila cyàkàbìdì. Nènku's ke bantèmù bàbìdì mbòbò abu.

<sup>73</sup> Mpindyewu tàngilàayi:

*Nènku bôbò nebàdyatakajè . . . Nènku nebàponè ku lusongo lwà mwelè wà mvità, . . . (mvensà wa 24) . . . lwà mwelè wà mvità awu, nè bônso nebàye naabò mu bupika mu matùnga ónsò: nè Yelusàlèmà neàdyatakajiibwè ku makàsà kùdì bàà Bisàmbà byà bendè, too nè . . . (Amen!) . . . too nè pàakùmbanà cikondo cyà bàà Bisàmbà byà bendè.*

<sup>74</sup> Bidi bipapulungana, kí mmwòmò anyì, bwà kumanya nè tudi nè cikondo kampàndà citùkòsela? Nzambì ngudi mwambè nànkù! Cipungu cyà bàà Bisàmbà byà bendè cyàkatwadija nè Mfùmù Nebùkàndènèèzà. Kaa, mùshindù mwinè wùdìbì bitàmba kumwèka's! Ndìbà kaayi dindì mwà kupicisha pa cyòcì eci, ànu bwà tusunsa tukesè cyanàànà! Kàdi mònaayi nè, muntu yònsò mmuswè lukonko lwèndè. Kàdi, patùcìdì pa cyòcì eci apa, twèlanganèpu meeji, bwalu cidi nè mushinga wàbùngi be mpindyewu, *mpindyewu* mene.

75 Tàngilàayi's! Nzambi wàkalombola cisàmbà, cyà beena Yudà. Kabàakadi ditunga to, bàvwa ànu cisàmbà cyanààna. Nè kacya kabàvwakù èkèleeziyà mudilongolwela to, bàvwa ànu èkèleeziyà *awu* mubiikidiibwe bwà kupàtuka. Kakùvwakù bulongolodi munkaci mwà beena Yudà to, bàvwa misangu yònsò ànu balombòdiibwe kùdi Nzambi.

76 Pashiishe pàvwàbi nè bilondèshilàngàne nè cidiidi, mu ditungà dijimà, bàakaswa kulwa...kwikala nè mfùmù. Ke Nzambi kubàpayè mfùmù kàdi kabyàkenda bimpè nànsha. Nzambi ke Mfùmù wàbò. Nzambi ke wetù Mfùmù, ncyà bushùwà, nè Nzambi ke Mfùmù wa Èkèleeziyà.

77 Mpindyewu, mònaayi díbà adi nè pàakakwàciibwàbo nè kuyabò naabò mu Baabùlòònà bwalu bàakateeta kutentula matungà à pa buloba. Cimfwànyi cilenga kaayi leelù ewu cyà èkèleeziyà úteeta kutentula maalu à pa buloba pambèlu pààpa, nè bapàmbùkè, bapàmbuke mu—mu nsòmbelu wabò. Èkèleeziyà ùdi nè nsòmbelu ànu udi nendè bàà pa buloba, wènzà maalu à lukutukutu, wènzà maalu ànu mùshindù awu, nè bikwàbò bintu, kàdi ùlaka mukana wàmba mùdiye Èkèleeziyà. Kwèna mwà kwenza aci to. To, mukalenge. Nsòmbelu webè mwinè's ngudi ujaadika cyùdi.

78 Cyùdi aci. . . Ànu bu mungàmbi ku cibangidilu amu nè, cyùdi mwaba kampàndà ke cyùdi uleeja pànwapa. Cyùdi aci, cidi ciikàle mubidi webè wà mu dyulu anyi wà pa buloba awu muulu mwàmwa, cidi mubidi webè wà mu dyulu mwikàle mwaba kampàndà ke cyòci cyùdi munkaci mwà kuleeja mwab'ewu. Mu buloba bwà nyumà, cyùdi aci, ke cyùdi kaaba aka. Pawikalà ànu nè meeji à ciipanshì nè bikwàbò mu buloba bwà nyumà, udi nè meeji à ciipanshì mwab'ewu. Wèwè muciiikàle ànu nè budimù, lukùkà, nè dikòkangana, udi mu ditunga dyà nyumà nè cyòci aci, cidi cidileejila apa nunku. Kàdi piikalà muntu webè wa munda ùkaadi musukùdiibwe nè mukezula, bìdi bìleeja nè wèwè udi nè mubidi kampàndà kuntu kwàka (mwindile) wùkaadi musukùdiibwe nè mukezùdiibwe awu, nè cidi cibinduluka mu mubidi. Kanwènaayikù numòna anyi? Nwamònu's, ke cyòci aci. "Ntentà wa pa buloba ewu yèyè munyanguke, tukàadi nè mukwàbò mwindile." Nwamònu anyi?

79 Mpindyewu, mu eci cikondo, cikondo cyà nshìikidilu, mùdi difwànyikija dyà mu musunya edi, matentula à bwena Kilistò neàsambakanè ónsò àkabwela mu Baabùlòònà munène umwèpelè ànu mwàkenzekàbi musangu awu amu. Nèku bàakaya naabò mu Baabùlòònà. Ncyà bushùwà anyi? Nè Bible mmwambè nè: "Mwanjèlò wa Mukalenge wàkabiikila wàmba nè: 'Pàtukàayi mu Baabùlòònà, cisàmbà Cyànyi!'"

80 Cibwejàkàji! Eci: "Mémè ndi Baptiste. Mémè ndi Méthodiste. Mémè ndi Presbytérien," byònsò abi bìdi ànu

cibwejàkàjì. Kakwènakù lupàndu munda mwàbì to nànsha kakesè.

<sup>81</sup> Mpindyewu, kanwàmbi nè ndi ngàmba nè ba-Baptistes kabèèna nè lupàndu to, nè ba-Méthodistes. Ncyèna ngàakula bwà aci to. Ndi ngàakula bwà èkèleeziyà nè bukolè bwèndè bwà cidiidi, nciidiidi. Nè bwà bìdi bitàngilà ngaakwilù wa cidiidi, bwalu wèwè udi Méthodiste, anyi Baptiste, anyi Presbytérien, anyi mwena Kàtòlikè, kacyèna mene nè bwalu bwà dyanza naaCì to. Nzambi kèna nànsha ùciitaba to, nè cidi mu Baabùlòona leelù ewu. Nè Nzambi ùdi munkaci mwà kubìikila Èkèleeziyà bwà kupàtukayi munkaci mwàbò bònsò, mwikàle ùkòka ùpàtula bàdi bakèzuke mu mwoyi, wenza Èkèleeziyà Wendè. Bilenga kaayipu's wè!

<sup>82</sup> Nènku mònaayi nè, ndi mwà kwamba cintu kampànda mwab'ewu cidi cifwànyine kunùpapula, kàdi piikalàbi—piikalàbi nè cidi. . . Tèèlejàayi, mpindyewu. Tàngilàayi mùdi Baabùlòona. . . Cyàkenzekà ku. . . mu—mu Baabùlòona, pàakatwàdiibwà bukolè pa bakuukwidi balelèlè. Vùlukàayi nè, ànu dyanza dikesè cyanàana, Shandàlakà, Meeshàkà, nè Abèdènegò, nè Danyèlè, dyà—dyà bakuukwidi balelèlè bàakapwekà mu bupika abu, díba dyàkabàbìikilà Nzambi bwà—bwà kuleejabò menemene meekala àbò, cìvwàbo aci. Bàvwa benzèjùbwe ku bukolè bwà kukuukwila lupingù. Ncyà bushùwà anyi? Dikuukwila dyà mpingù! Bàvwa benzèjùbwe ku bukolè bwà kukuukwila lupingù, nè bivwa bikèngela bwà kwìnámabò kumpàlà kwà lupingù. Nènku bu bòbò kabàyi bacyènzè to, bàvwa bakèngèshìbwe.

<sup>83</sup> Kaa, ncimfwànyi kaayi cinùvwà mwà kupàtula mu Danyèlè, Bwàkabuulwibwà, kulamakaja byòbì abi pàmwè nè kuleejila ku Mifùndu nè Èkèleeziyà ùdi ùbwela mu dikèngeshiibwa dyà mùshindù wùmèwùmè kumpàlà kwà kubìikidiibwaYè bwà kupàtuka. Mùshindù awu ke wàkabwejàbo Èkèleeziyà wa bàà Bisàmbà byà bendè, ke mùshindù wàpàtudiibwà Èkèleeziyà wa bàà Bisàmbà byà bendè. Mwàkabwelàye amu ke mwàyàye.

<sup>84</sup> Kàdi tàngilàayi nùmonè mwàkamònàye cimfwànyi aci. Nènku mpindyewu, vùlukàayi nè, cimfwànyi aci. . . Mpindyewu, eci nkwetù kundela. Tàngilàayi, mèmè ndi ngiitabuuja nè cimfwànyi cìvwa Mfùmù Nebùkàndènèèzà mwenzè cìvwa cyà Danyèlè, muntu wa cijila. Bu nwènù mwà kumòna, Mfùmù Nebùkàndènèèzà ùkaavwa mumane kwinyika Danyèlè, mumwinyike nè “Belèshààsà” (aci cìvwa lupingù lwèndè), nè yèyè wàkenza—kwenza cimfwànyi, nè muntu nànsha umwe paanyimà pàà Danyèlè mumane kwediibwa mu bwinà bwà ntambwe ebu, nè bikwàbò, ke yèyè nè: “Kabivwa bikèngela bwà muntu nànsha umwe àsadilè nzambi mikwàbò to, nè bikwàbò, ànu Nzambi wa Danyèlè.” Cìvwa pàmwàpa cimfwànyi cyà muntu wa cijila, lupingù lunèna, nè muntu yònsò ùvwa nè cyà kulwinamina.

85 Kàdi Èkèleeziyà, Shandàlàkà, nè Meeshàkà, nè Abèdènègò... Danyèlè mwikàle mulombodi, bu mùdi Kilistò mwikàle Mulombodi wa Èkèleeziyà.

86 Nènku bàvwa nè cyà kwinamina cimfwànyì eci nè kukuukwila cimfwànyì eci. Mònaayi's! Nènku nudi numòna's, mu bikondo abi, Danyèlè ùvwa mupùwe. Amen! Kaa, nè ndi ntékemena nè nudi bumvwè eci. Danyèlè ùvwa mupùwe. Ùbàlekela... byàkakèngela bwà kwenzabò disungula dyàbò sungasunga.

87 Mu ditùkù... mu dipàtuka dyà mu cipungu cyà bàà Bisàmba byà bendè, nekwikalè cimfwànyì, nè nebikèngelè bwà bantu bònsò kwinaminabò kumpàlà kwà cimfwànyì eci nè kukuukwilabò bushùwà. Nànsha cyòci ciikàle cyà cijila bìshi, kanwèna nè cyà kukuukwila cimfwànyì kampàndà to (dikukwila dyà cimfwànyì).

88 Mpindyewu, mònaayi's. Kaa, èkèlekèlè! Ànu ku ndekeelu menemene aku, ke Danyèlè kubwelamù cyàkàbìdì. Mùshindù mwinè wùdibi bikèmesha's wè! Dilòlò adi kumpàlà kwà difestò dinène dyà bandumbà nè bikwàbò, kwàkalwa Cyanza ciikàle cìfùnda pa cimanu nè: "MENE, MENE, TEKEL, UPHARSIN," ku cimanu aku. Nènku dyumvwija, muntu nànsha umwe kàvwakù mwà kudìfila to, cyàkafùndiibwa mu myakulu myenyi. Muntu nànsha umwe kàvwakù mwà kuCyùmvwija to.

89 Kuyabò kangata bamanyi bààbò bàà mabàla bàà batàmbe bwìmpè. Kwambabò nè: "Katwèna bamanyè to."

90 Kuyabò kangata beena mikendi bààbò nè balongi bàà mabulungà. "Katwèna bamanyè to. Katwèna bamanyè kantu nànsha kàmwè pa bwalu Ebu to. Kacya katùtukù banji kumòna mwakulu wà mùshindù awu to, kacya katùtukù banji kuumvwa wà nànkù kacya bààtùlela to."

91 Kàdi kùvwa muntu's! Nzambì ùvwa nè muntu Wendè, Danyèlè ùvwa mwaba awu. Yèyè nè: "Ndàayi nùkamwangàte," yèyè nè, "bwalu Nyumà wa Nzambì mmusòmbe munda mwèndè."

92 Ke Danyèlè kulwayè mwaba awu, kubangayè kubala nè kuumvwija mwakulu awu ku cimanu, nè kuflayè... Dyumvwija òvwa ncinyi? Kì nne: "Kaa, wèwè bènèshiiwbàku, Èyi mfùmù, ikàlà nè mwoyi kashidi to." Kàdi nè dimubènga dikàyàbàle, dyumàkàne, dyàmba nè: "Udi mupimiibwe mu cipimu nè musanganyiibwe kùyi bujitu to."

93 Tàngilàayi, ke mùshindù wùm wèwùm wèwè awu. Mùvwà Citàmbe-mfùkilu aci cibwejè bukalenge bwà bàà Bisàmbà byà bendè, pa nànkù Citàmbe-mfùkilu cìdi munkacì mwà kuumusha eci mu bàà Bisàmbà byà bendè. Bukalenge bwàkatwàdija ku Citàmbe-mfùkilu, bùdi nè cyà kujikà ku Citàmbe-mfùkilu. Bimanu byà Yelusàlemà nebidyatakajiibwè, nebiikalè...

nebiikalè mwà. . . “Bàà Bisàmbà byà bendè nebiikalè naabu too nè pààjikà cipungu cyà bàà Bisàmbà byà bendè.” Dìbà adi Nzambi ùdi ùkùdimukila kùdì beena Yudà. Amen! Kaa, èkèlekèlè!

<sup>94</sup> Kaa, balundà bàànyì, mvwa njinga nè tuvwa mwà kucyùmvwakù bîmpè. Kî mmwómò anyì? Kwangataku bu lumingu lujimà pa cyena-bwalu cimwèpelè aci, nwamònu’s, bwà twamòna mwà kucikenketa cyònsò munda mwà Mifundu.

<sup>95</sup> Aci, tàngilààyi, tèèlejààyi—tèèlejààyi nè ntèmà mpindyewu cyàkambàYe. “Yelusàlèmà neàdyatakajiiwbè ku makàsà kùdì bàà Bisàmbà byà bendè too nè pààjikà cikondo cyà bàà Bisàmbà byà bendè.” Dikwàciibwa kùdì—kùdì Tiitus, pashiishe kubwela, kwangata Yelusàlèmà. Yèyè nè: “Mpindyewu—mpindyewu, nwàkumvwa bwalu bwà cinyangu cìdì cilela kabùtù?”

“Èyowà.”

“Èè, apu mpàdì bàà Bisàmbà byà bendè bàbwela’s.”

“Èyo, tudi tuumvwa aci,” mwàkambà bayiidi.

“Mpindyewu, bàà Bisàmbà byà bendè bàkaadi nè bukalenge bwàbò mpindyewu.”

“Bushùwà’s.”

<sup>96</sup> “Yelusàlèmà mwînshì mwà bukalenge bwà bàà Bisàmbà byà bendè dìbà adi anyì?” Èyowà’s, mukalenge! Beena Loomò. Bàcivwa ànu nè bukalenge mu—mu Yelusàlèmà. Nènku bwàkatwàdija kale wàwa ku cinyangu cìdì citwàla dibùtuka dikolè dyàkambà Danyèlè adi.

<sup>97</sup> Mpindyewu Yèyè wàkamba nè: “Cikondo aci cìdì pabwìpì mpindyewu, bwalu bwà nebàshimbule ntempèlù ewu nè kwibakapù Mosqué wà Omar, newikalà nè cyà kwimana ànu pa kaaba kàmwekàmwe aka, Bamùzùlùmaanyi, Bàà bisambà byà bèndè. Nènku neciikalè mwà kwimana mwaba awu.”

<sup>98</sup> *Wa Bisàmbà byà bendè* mbwena kwamba nè “mwena bupidyà.” Mpindyewu, awu kàvwa Èkèleeziyà to. Úvwa wa bàà Bisàmbà byà bendè, nwamònu’s, mwena bupidyà. Mpindyewu, nènku aci neciimanè too nè pààjikà cipungu cyà bàà Bisàmbà byà bendè. Pashiishe pààjikà cipungu cyà bàà Bisàmbà byà bendè, bikèngela bwà Mfùmù munène ìmanyinè bantu (Udi Kilistò awu) ku cikondo cyà nshìkidilu.

<sup>99</sup> “Wàkalwa kùdìYe,” mu Danyèlè, “Uvwa nè nsuki mitòòke bu myòsà yà mùkòòkò,” bu mutùvwà baMumòne mu Bwàkabuulwibwà 1 nè: “kùdì Mukùlumpè wa bikondo. Nè Cilumbulwidi cìvwa citwàdije nè Mikàndà yàkabuuludiibwa. Mikàndà” (ku bùngì) “yàkabuuludiibwa nè muntu yònsò wàkalumbulwishiibwa ku Mikàndà, bintu bìvwà bifùndiibwamù.” Tàngilààyi, Mikàndà yàkabuuludiibwa nè: “WàkaMumòna ùlwa, nè binunu dikùmi misangu binunu dikùmi bìMukwàcila mudimu.” Bansantu bàlwe Nendè. Ncyà

bushùwà anyì, mu Danyèlè? “Nè Mikàndà yàkabuuludiibwa,” ke Mukàndà wà mwoyi wèbè ngwòwò awu, “nè muntu yònsò— nè muntu yònsò ùvwa ùlumbulwishiibwa mùshindù awu, ngènzàmpèkààtù, ùlumbulwishiibwa mùshindù ewu. Nè Mukàndà mukwàbò wàkabuuludiibwa,” wùvwa Mukàndà wà Mwoyi awu, “nè muntu yònsò wàkalumbulwishiibwa.”

<sup>100</sup> Mpindyewu mònaayi, misangu yònsò nwàvùlukaayi nè, cibwejaayi mu *yisàtù*. Nwènu kanùyì bavùlùke to, nudi bushùwà nubwela mu cibwejàkàjì. Kùvwa bitùpà bisàtù byà bantu balediibwe pa buloba; kùvwa bitùpà bisàtù ku cibangidilu; nekwikalè bitùpà bisàtù ku ndekeelu. Ncinyì. . .

<sup>101</sup> Yesù wàkaalukila nè binunu dikùmi misangu binunu dikùmi, bàMukwàcila mudimu. Nudi bamuvùlùke wàmba nè: “Kì nkaacintu kakesè bwà nwènu kwangata. . . anyì cintu cidi kaciyì mu cyôci bwà kuya nè maalu ènù nè ndululu yènù ku tubàdi, kàdi kanùyì bamanyè nè Bansantu nebàlumbulwishè buloba anyì?” Bansantu bàdi bàlumbulwishà buloba! Àlèluuyàh! Ndi ngèèla meeji ku cyôci aci’s, èkèlekèle! Pa kuMumòna ùlwa, kwaka, nè basukula mu Mashi, paanyimà pàà Bukalenge bwà bidimu cinunu, bupikudi nè bapikula bàà bikondo byònsò biimàne mu Bwikadi Bwèndè. Mukàjì-musèla musukula ku Mashi!

<sup>102</sup> Kì ng’aba bàdi ànu bantu bìmpè to, ncyà bushùwà nè bàdi bàpangila dibìikà dyà ku lufù dyà kumpàlà. Bible mmwambè nè: “Nè bafwè bakwàbò kabààkiikala nè mwoyi to too nè pàakajika bidimu cinunu.” Ncyà bushùwà anyì? Ke aba bàvwa nè mènà àbò mafùnda mu Mukàndà wà Mwoyi wà Mwànà wa mùkòòkò kàdi bààkabènga dibàtiiza dyà Nyumà Mwimpè.

<sup>103</sup> Ànu Basungula mbàdi bàbwela mu ciinè cikondo aci. Ànu Basungula mbàdi bàngata Bukalenge bwà—bwà—bwà bidimu cinunu. Kaa, dîbà adi, mwanèètù, bìvwa bikèngela bwà twètù kwikala bantu bàà mùshindù kaayi? Ndi muswè kwikala nè mwoyi mu Bukalenge bwà bidimu cinunu! Tùteekàayi ku luseke bujitu nè bujitu bwònsò nè mpèkaatù udi utùcincimika bipeepèle nùku awu. Bu mulùmýànà mwà kwamba cintu kampàndà cibi anyì mwà kwenza cintu kampàndà mùshindù ewu, musambidilà nè tùngunuka nè lwendu. Kèèbè kiipàcilà kàmwèpelè kiikalè katàngija kùdi Nzambì. Muntu mukwàbò nànsha umwe yèyè kàyì mukùfikè to, wèwè fikàku! Bwalu nekwikalè Basungula biikalà nè cyà kushààla nè mwoyi mu Cikondo cyà Bukalenge bwà bidimu cinunu nè nebàbwelè nè nebàpàtukè nè Kilistò munda mwà bidimu cinunu, nè pashiishe nebàbandè mu Butumbi pàmwè Nendè nè nebàpinganè cyàkàbidì. Pààtwàdiibwà dibìikà dyà ku lufù dyà beena lwonji, dîbà adi Bukalenge bwà bidimu cinunu nebùtwadijè. . . Paanyimà pàà Bukalenge bwà bidimu cinunu bumanè kujika, dîbà adi Kilistò neàbandè nè Èkèleeziyà, nè ku ndekeelu kwà bidimu cinunu Yèyè neàpinganè nè Èkèleeziyà.

104 Kilistò ùdi ùlwa misangu yisàtù. Musangu wà kumpàlà, Wàkalwa bwà *kupikula* Èkèleeziyà Wendè. Ncyà bushùwà anyi? Musangu mwibìdi, Yèyè udi ùlwa bwà *kwangata* Èkèleeziyà Wendè. Musangu mwisàtù, Yèyè udi ulwa nè Èkèleeziyà Wendè. Nwamònu anyi? Yèyè wàkalwa bwà *kuMupikula*; Ùdi ùlwa bwà *kuMwambula* nè kuya Nendè, mu cikondo cyà bipùpù nè bikwàbò; wàlukila bwà *Bukalenge bwà bidimu cinunu*, mwikàle nè mwoyi mu Bukalenge bwà bidimu cinunu.

105 Pashìishe ke Mfùmù munène nè Mukalenge-Mukàjì kupwekabò bwà Cilumbulwidi. Cilumbulwidi cyà Nkwasa Mutòòke cidi citwàdija nè Mikàndà yàkabuuludiibwa. Nènku's ke bapikula abu biimàne mwaba awu's, Èkèleeziyà mulediibwe kùdi Nyumà Mwímpè wa Nzambì udi nè Mwoyi awu, mwimàne mwaba awu mu bulenga Bwèndè bwà kulumbulwisha. "Mikàndà yàkabuuludiibwa, cilumbulwidi cyàkatwàdija nè muntu yònsò wàkalumbulwishiibwa mùshindù awu," awu ùwva ngènzàmpèkààtù. "Nè Mukàndà mukwàbò wàkabuuludiibwa," kabiyi bwà Mukàjì-musèla wa Nyumà Mwímpè to, Yèyè kààkupicilakù to bwalu Ùdi mu Dyambwibwa.

106 Wèwè muujiibwe tètè nè Nyumà Mwímpè mu dindà emu, nè bukolè bwà Nzambi bwikàle bùkwàta mudimu mu kajilu nè kajilu kònsò kàa mubidi wèbè, mbifwànyine kwikala nè dikwàcisha kaayi bwà wèwè kwimana mu Cilumbulwidi? S'ukààdi mumanè kulumbulwishiibwa, nè mwitàbìibwe, nè muujiibwe tètè, nè mumanè—mumanè kutentemunyiibwa mu myaba yà mu Dyulu pàmwè nè Kilistò Yesù. Kí nnè *newikalè* to, udi mpindyewu ewu, ànu mpindyewu mene mutentèmùnyiiibwe's!

107 "Aba bàdiYe mubiikile, mMubàbingishe; aba bàdiYe mubingishe, mMubàtùmbishe." Nè muntu mupikula yònsò pa buloba mu dindà emu, udi mwínshì mwà Mashi à Yesù Kilistò awu, muujiibwe tètè nè Nyumà Mwímpè, *ùdi nè* Mwoyi wà kashidi nè kèna mwà kubùtuka to, nè ùkaadi mu myaba yà mu Dyulu pàmwè nè Kilistò Yesù, nè kààdyàkubwelakù mu dipiilla to. Mmùmana kupikula's! Abi kí mbilenga byà dikèma anyi? Nwamònu anyi? Mumana kupikula, musòmbe mu myaba yà mu Dyulu mpindyewu pàmwè nè Kilistò, nè mutùm-...mumanà kutùmbishiibwa, mumanà kutùmbishiibwa!

108 Wèwè udi wamba nè: "Mwanèètù Bill, Mufundu awu wùdi wàmba nàнку anyi?"

109 Yesù wàkamba nàнку, anyi Mufundu wùdi wàmba nàнку, anyi bafundi. Pòlò, wàkamba nè: "Aba bàdiYe mubingishe, Ùkaadi mumanè kubàtùmbisha. Aba bàakadyànjiilàYe kuteeka mu mudimu, Yèyè wàkadyànjiilà kubàlongolola; aba bàakadyànjiilàYe kulongolola, Yèyè wàkabàbingisha; aba bàdiYe mubingishe, Ùkaadi mumanè kubàtùmbisha." Ncinyi aci? Kaa, ekèlekèle! (Mfwilaayikù luse.) Ùkaadi mumanè kubàtùmbisha!

Dìbà adi patwikalà buulè tètè nè Nyumà Mwîmpè, tujilu twètù nè buumùntù bikaadi biimanè kwikala bilamiibwe mu Nzambì, kùdi mubidi mutùmbìshìibwe ùkaadi mwindìle, nè bìdi bikèngela wèwè kukabwelamù pàdì ewu nùnkù ùfwa. Aba bàdìYe mubingshe, Ùkaadi mumanè kubàtùmbisha!

<sup>110</sup> Ncîmvwà ngàmba katancì aka aci, ciibùlòjì nè cintu cyena diinà. Mvwa njinga nè ngíkalepù mulongè nànsha kàlaasà kakùmbàne bwà kupàtula cyòci aci patòoke nè kucyùmvwija nè kunùtòokeshilacì, kàdi ncyèna ànu mwà kucipeta to. Ndi mumanyè cîndì ngàakula aci, kàdi ncyèna mwà kucileeja mu mùshindù wùndì muswè kucileeja to.

<sup>111</sup> [Katùpà kàà mukàbà wà mèyi munda mutupù—Muf.] . . Mbù Mukünze nè bintu byònsò bidìbo bàpàtula ebi. Byamù bidikù, beena Yudà, babanji ànu bàà menemene abu, pashìishe cintu cìmwècìmwè aci necikooyishè cyàkàbìdì mu citùùdilu cyàbò. Èyowà! Nebàlwe buludì, mu bimenga byà pa buloba. Russie neàpwekè, wàmba nè: “Bìdi bikèngela ànu bwà twètù kwikala nè bintu abi. Byòbì abi ke uranium nè bintu bikwàbò byònsò bìdì kuntu kwàka, tudì nè cyà kuya nè kubyàngata.” Nènku pàdìbo bènda bàpweka apu, dìbà adi nekùlwe mvità yà Haamagidònà. Aci necìikalè dìbà diimanà Nzambì bu mwàkiimanàYe mu cibandabanda bwà bânà bàà Izalèlà nè kulwàngana kàbìdì mvità. Kàdi aci ncyènzeke too nè pàajìkà cipungu cyà bàà Bisàmbà byà bendè. Nènku pàajìkà cikondo aci, ùdì ùmushiibwa.

<sup>112</sup> [Katùpà kàà mukàbà wà mèyi munda mutupù—Muf.] Mpindyewu bwà ku wanyì mmwènenenu mupwekèle, muntu munanga udi mwelè lukonko elu kaaba aka ewu, ku wanyì mmwènenenu wa mupwekèle pa bwalu ebu:

### **10. Bantu bàà mfyondo bàvwa mu miinè matùkù awu aba bàvwa mbanganyì?**

<sup>113</sup> Mpindyewu, Josèphe wàwa . . . Mu bushùwà bwà bwalu, ndi mumanyè nè, èkèleeziyà wetù, nwènù nudi ànu bu mèmè. Mèmè—mèmè ndi mudingàpàle mwena kàlaasà kàà mwandamutekète nè ncyèna—ncyèna ncyùka bwalu bwà kàlaasà nè bikwàbò to. Ngèela meeji nè ke cipumbishi cyà citàmbe bunène cikaadiku Èvànjeelìyò mupetè. Kàdi nànsha nànkù, ànu ku misangu, ndi ngàngata mukàndà wùmwè anyì yìbìdì. Mpindyewu, byenzedi byànyì nè bantu bu mèmè mwinè, tudì bònsò ànu mu njila umweumwe awu, tudì ànu bantu bèètù bàà pàtupù aba. Nè mèmè ndi nè kusàkidila kwàbùngì. Bible mmwambè nè: “Bantu bàà pàtupù aba bàvwa bàMutèeleja nè disànka dyònsò.” Bantu beena byùmà, dìbà adi kùvwa cikwàbò cipidì, kàdi bantu bàà cyanààna . . . Ànu musùmbà wà bantu bèètù bàà pàtupù aba bu mutùdì emu, bantu bàdi banangè Nzambì nè kabàyi nè byàbùngì byà pa buloba ebu nànsha, biikàle nè bânà bààbò balela nè mèkù abò, tudì banangè Nzambì nè baswè kuya mu èkèleeziyà,

kupèeshangana bi—bilàmbà byà pambidi pètù bwà Bukalenge Bwèndè, cintu cyà mùshindù awu. Tudi baMunangè, netwenzè cintu kanà cyònsò, abu ke bantu bàà cyanàànà bààkaMutèèleja. Nènku cicidi ànu cintu cimwècimwè aci leelù, bantu bàà cyanàànà bàvwa bàmutèèleja nè disànka.

114 Mpindyewu, muntu mubanji ùdi nè bintu byàbúngi menemene byà buloba bìvwàye wèlela meeji, nwamònu's. Nè— nè muntu mulelèlè kuntwaku wùdi kùyì mwà kwenza nendè cintu nànsha cimwè, mu mulongo wà njila, yéyè kàakutuma ànu ntèmà ku Cyòci aci to. Kàdi ànu bantu bàà pàtupù aba bààkaMutèèleja nè disànka dyònsò.

115 Nènku mpindyewu mu Josèphe, mifundù yèndè ayi, yéyè wàkamba. . .Mpindyewu, dyumvwija dyèndè ndyòdi edi dyà “bànà bàà balùme bàà Nzambi” aba bààkangatà bànà bàà bakàji bàà bantu abu. Wàkamba nè “ Nyumà mikùlùke yìvwà pa buloba. . .”

116 Mpindyewu, nudi bamanyè. . .mu Bwàkabuulwibwà, nshapità wa 11, anyi, wa 7, to, mfwilaayikù. . .nshapità wa 12 wa Bwàkabuulwibwà, mukàji mwimàne mu díbà. “Dragon mukùnzè wàkajìngila byà bisàtù bibidi byà mitooto mukilà wèndè nè kuyìpulumuna pa buloba.” Tudi bamanyè nè Sàtaanà, ku cibangidilu, wàkaasa bukalenga kampàndà ku malaba à ku Nord bwà kwikalabù bulengèle kutàmba mùvwà—kutàmba mùvwà bwà Mikàèlè, nè kùvwa. . .pashiishe kukùtulayè mvità mu Dyulu. Nè kupulumunayè byà bisàtù bibidi byà banjèlò pàmwè nendè. Mmwòmò anyi?

117 Ke bwà cinyi twètù tudi ànu banyaàbanya cyanàànà. Ndi muswè kwamba nè—nè—nè luseke. . .luseke lukese lwà bantu mu dindà emu, mu cipaapu cyà beena Kilistò, bantu balela kùdi Nyumà Mwimpè, bwalu bàdi mu—mu—mu katùpà kakesè. Ncyà bushùwà.

118 Nènku nwènù mwà kutàngila nyumà yàkajuukà mu Genèsè nè kutwàdija kwenda kubànda, tàngilàayi nùmonè dikuukwila dilelèlè dyà èkèleeziyà dyà mu tùlaasà, dyà mu tùlaasà tutumbùke adi. Ditàngilaayi mu Kaayinà mwàmwa, ditàngilàayi leelù ewu. Dipweka buludi, ditungunuka ànu nè kutentemuka kubwela nè mu Bààfalèsà. Nènku kùdi tusumbù twàbò túbidi, Mùfaalèsà nè Mùsadòkà. Nwamònu's, didi dipàtuka ànu buludi, nè ditàngilaayi leelù ewu mu cyena Kàtòlikè nè nkwaka minène mùshindù awu, myaba minène milenga ayi.

119 Èè, tàngilàayi Abèlè nè mwànà mukèsè wa mùkòòkò awu, nwamònu's, ànu wa ciibidilu ewu. Citàngilaayi mu matùkù à Yesù. Citàngilaayi ànu ku cibangidilu aku mu Mifundu panùdi nucibàndisha, numòna mùshindù wùdici. Tudi nè mwoyi mu ditùkù adi mùdi díbà didi Nzambi mubiikile Èkèleeziyà Wèndè kubangila ànu ku mbangilu too nè ku ndekeelu. Kakàbà kakesè,

kakàbà kakesè kakùnze aku kàdi kàpicila mu Bible mujimà, njila mujimà awu, bantu basukula mu Mashi. Mònaayi!

<sup>120</sup> Mpindyewu, “bàna bàà Nzambi” aba ku wanyì mmwènu, to, ncyà bushùwà nè kí ndipanganangana anyi kuteeta bwà kwikala nè meeji matwè anyi kwamba nè Josèphe kàvwa mumanyè cìvwàye wàmba aci to, kàdi yéyè ùvwa muntu ànu bu mèmè kùnu. Nànsha byòbì nè ùvwa mumanyi wa dibàla wa bìshi, ùvwa ànu muntu wetù ewu. Nènku cintu cìmwèpelè cìvwàye naaci, yéyè wàkakèbulula mifùndù yà kale ayi, nè bikwàbò byà mùshindù awu, nè bishààdìlè byà kale abi, nè bikwàbò, kàdi yéyè kàvwa nè citàmba bitùdi naabi leelù ewu ebi to, Nyumà Mwimpè. Mpindyewu, yéyè ùvwa wènda ùya ànu ku meeji à cìfùkìlu aa.

<sup>121</sup> Kàdi tudi tucyàngata nè meeji à nyumà. Bòbò “bàna bàà Nzambi abu,” pààbì’s, nè bàvwa banjèlò. Ndi ngiitabuujà nè ke cìdìbo. Nènku ndi—ndi ngiitabuujà nè. . .

<sup>122</sup> Mpindyewu, Josèphe wàkamba cintu cìmwècìmwè aci, kàdi yéyè wàkamba nè: “Bààkadyènzeja ku bukòlè nè kudifindabò mu mubidi wà buntu, nè kwangatabò bàna bàà balùme. . . nè— nè kwangatabò bàna bàà bakàjì bàà bantu.” Mpindyewu, tudi musùmbà wa bantu basambàkàne; tudi bashiilàngàne apa mu dindà emu, balùme, bakàjì, nè bàna batekète bàà bakàjì nè bàà balùme, nè ndi ngàmba cyòcì eci bwà bantu bakùlumpè kuumvwabò cyà bushùwà. Kàdi dìbà. . . Yéyè ùdi wàmba nè: “Pààkamònà banjèlò dijinga dyà bakàjì, mùshindù wùvwa balùme bàsòmba nè bakàjì, mu mùshindù wà nè bààkadyènzeja bwà kubwela ku bukòlè mu mubidi wà buntu. Pa nàнку. . . ke kudyàngacilabò bàna bàà bakàjì bàà bantu.”

<sup>123</sup> Èè, mèmè—mèmè ncyèna ngiitabuujà aci to. Ndi ngiitabuujà nùnkù nè, mbalediibwe mu Kaanààna amu, nè bààkalediibwa mu kasùmbù kàà—kàà Kaayinà kààkatùmiibwa ku buloba bwà Nodà aku. Nè ùvwa nè cimanyinu pambidi pèndè bwà muntu nànsha umwe kàmushipìku to, bwà ngiikàdìlù wèndè wa mushipyanganyi awu, kushipa mwanààbò wa balùme. Kàdi bu nwènu mwà kumòna, nànsha beena Izàlèèlà bààkasangana bàmwè bàà ku bantu abu pààkayàbo kuntwaku. Bavwa sangana bàà dikèma, ke yéyè nè: “Twètù’s tuvwa tumwèka bu tupasu, lwà ku luseke lwàbò aku.” Ncyà bushùwà anyi? Nkàmà nè nkàmà yà bidimu paanyimà, kùvwa bantu banène, bapàyàme, bantu banène. Nè mîngà misangu bàtu bùmùla bi—bitàlù byàbò, nè bàvwa bàsangana nè bàvwa bantu banène.

<sup>124</sup> Mpindyewu kùndì ngèèla meeji nè ke kùdìbo bafùmine. Mpindyewu, ke kàanyi kaadilongesha kàà sungasunga kakesè aka mpindyewu. Kàdi ànu bwà beena kwitabuujà bàà mu èkèleeziyà, nwamònu’s. Ndi ngèèla meeji nè Kaayinà ùvwa mwànà wa Sàtaanà. Ndi mumanyè nè nwènu nudi nubèngangana nè aci, ke cidi èkèleeziyà wanyì sungasunga

wènza. Kàdi aci cìcìdi ànu...Too nè pààndeejà Nzambi bishiilàngàne, mèmè—mèmè nēngiitabuujè cintu cimwècimwè aci, nwamònu's, nè yéyè ùvwa mwànà wa Sàtaanà. Bwalu ncivwa mwà kumòna nyumà mushipyanganyi udi kàyi ùcìina Nzambi awu, ùpàtuka mu Nzambi nànsha. To, mukalenge. Bivwa bikèngela bwà yéyè kwikala mufwàna papa wendè, nè papa wendè ùvwa cikampàndà...mwab'ewu, pàakafikà Sàtaanà pa nyòka apu.

<sup>125</sup> Nè nyòka awu kàvwa nyama wa ùdikòka panshì to, mulawu ngwàkamuvwija nyama wa ùdikòka panshì. Yéyè ùvwa ànu bu muntu, ùvwa wèndela kuulu mwolòlòke. Nè ùvwa mupàtùke nè mukàjì ewu pambèlu apu, nè yéyè wàkenda masandi aa nè kulela mwanèndè wa balùme wa kumpàlà uvwa Kaayinà awu, ngiikàdilù wa tatwèndè. Nènku ndi ngiitabuujà nè nyama munène awu ùvwa mwimàne kuulu bu mùdì muntu emu, nè ùvwa wèndela kuulu mwolòlòke, nènku mwaba awu ke wùdì bantu bàà mpolondo aba bafùmìne. Èyowà, aci's mmwòmò menemene. Mpindyewu, awu's mmeeji àànyì mèmè mwìnè nè ndì—ndì mwà kwikala mutùpàkàne. Ke meeji àànyì ngòwò awu, nwamònu's. Kàdi bàvwa bantu banène.

<sup>126</sup> Nènku bu nwènù mwà kumòna, Nzambi mwimàne mwaba awu kumpàlà kwà Adàmà nè Evà, Yéyè ùdi wàmba nè: “Ndi mukupàtùle mu lupwishi, newàlukilè mu lupwishi. Ndi . . .

<sup>127</sup> “Nènku bwalu udi mulwè nè webè. . . udi mutèèlèje webè. . . mutèèlèje nyama pamutù pàà bàyeebè, nè udi mupàtùle mwoyi pa buloba, nè newùwalùjè cyàkàbidì mu buloba.”

<sup>128</sup> Ke Yéyè nè: “Nyòka, mikòlò yèbè neyikòsekè, nwamònu's, kwàkwendela kàbidì kuulu nànsha. Nè kwàkwikala nyama to, newikalè udikòka panshì mpindyewu. Nè newèndelè mu difù dyèbè, nè lupwishi nelwikalè cyàkudyà cyèbè.”

<sup>129</sup> Ke mwaba wùndì ngèèla meeji nè bòbò abu. . . Kaayinà, mufwàne ngiikàdilù wa nyama uvwa musòmbe nè. . . bu nyamà, uvwa musòmbe nè mukàjì ewu wàkalela mwànà ewu, uvwa citùpà nyama nè mwènzè bu muntu, mulùmyànà munène wa kale awu. Ke pashiishe kuyayè kuntwaku nè bàna bèndè kubangabò kufùmìna kùdìye, nè pashiishe nyama àyi, lukùkà lwà masandi bu lwà pàpa wabò ku cibangidilu, nyama wa kale wa lukùkà awu wàkasangana bàna bàà bakàjì abu nè bikwàbò, nè bàakadyàngacila bàna bàà bakàjì bàà bantu. Ncyà bushùwà.

<sup>130</sup> Nènku cyòci aci ke cyàkatwàlà balùmyànà aba, ncyà bushùwà, cyàkapweka nànkù kupicila mu ndelànganyi yimwèyimwè àyi yìvwà nyumà mikùlùke àyi yàkapwekà pa bantu. Vùlukààyi nè, nyumà yimwèyimwè àyi yìvwà nè mwoyi kale wàwa, leelù ewu. . . yidi nè mwoyi leelù ewu.

<sup>131</sup> Citàngilaayi leelù ewu! Èè, tudi nè bantu mu ditùnga emu bàdi. . . Mpindyewu, ncyèna. . . Eci, mèmè ndi mwena Àmèrikè, s'nudi bamanyè nè ke cìndì. Kàdi lekèlaayi nnwàmbilè nè,

edi nditùngà dyà ditàmbe kushààdila pakuumusha Paris, mu France, ku wónsò àndi mumanyè à ní mpenyi pónsò pa buloba bujimà. Nditàmbe kupwekeshiibwa be!

<sup>132</sup> Mòna's, nànsha bantu bàà ku baabèndè, mu Àfrikè, mu—mu Suède nè. . .kuntu kwàka, bàdi bàmba nè: “Mbwalu kaayi ebu nè nwènù beena Àmèrikè aba, nwènù bónsò kanùcyenàku kàbìdì nè kaneemu bwà bakàjì bèènù anyi? Bwalu misambu yónsò ku tudyòmbà, musambu wà mùshindù kampàndà wà kale wà manyaanù, wà ciipanshi bwà bakàjì. Kanwènakù nè kaneemu nànsha kakesè bwà bakàjì kuntwaku anyi?”

<sup>133</sup> Misambu yètù yónsò yìdì yìtàngilà bakàjì, anyi byà bulùme nè bukàjì nè dyalakana, nè bintu byà mùshindù awu. Mbwalu dyabùlù mmuyitwe byanza. Aci ncyà bushùwà menemene. Hollywood wa kale awu nè mantèlèviziyò nè bikwàbò byónsò bìdì bipàtula bintàkanyi byà cipanshi bìdì kabìyì bicìina Nzambì abi, nebiye mu bipànyishidi byà bibèjibeji nè mu bintu byónsò bikwàbò. Bintu byónsò bikaadi ànu bakàjì butakà anyi cintu kampàndà. Ke cyòcì aci menemene cyàkabangàci ku cibangidilu, nè ciikàle cìjika mùshindù wùm wèwùm wè awu. Mbundù's!

<sup>134</sup> Nè mwongo wà ditùnga kanà dyónsò mbukàjì, pàdìbì bifika ku nsòmbelu mujaalàme. Kàdi panùdì nushimbula buumaamù, nwàshimbùdì ditùnga dyènù. Tukàadi bakafikè mu mùshindù wà nè bakàjì bèètù. . .bàdi munkaci mwà kunwà mfwankà, nè bintu byà mùshindù awu, nè munkaci mwà kunwà maalà à whisky, nè kwenza bintu byà lukutukutu, nè aci's—aci's ncyà bundù!

<sup>135</sup> Nsongàalùmè kampàndà bwà kuteeta kupeta mukàjì ucìdì virgò, udi nè dimanya dyà maalu mu nsòmbelu, nebimukèngèlè bwà yèyè kunyunguluka mu èkèleeziyà kampàndà mwimpè, mukesè, wa kale, mùlè tètè nè Nyumà Mwimpè, pàmwàpa, bwà kumupeta; nè aci ncyà bushùwà menemene, mwaba wùvwà ànu mulùme kampàndà mujaalàme mumulamè nè bintu byà mùshindù awu, kàbìdì mwikàle nè nsòmbelu wa kaneemu ndambù mu yèyè.

<sup>136</sup> Udi mufwànyine kwela meeji nè aci ndipaala, kàdi, mwanèètù, nùcìtàngilaayi nùjandulè, bwà nùmonè ní kí m'Bulelèlè. S'mbundù! Èyo.

Bòbò bàvwa bàna bàà Nzambì bàdi ku. . .Mpindyewu, aci, ndi mwà kuumvwija wànyì. . .Pàndì—pàndì mumanyè ní. . .

<sup>137</sup> Mvwa nè lukonko lukwàbò leelù ewu, bàdi bàmba nè: “Mòna's, Mwanèètù Bill, Bible's mmwambè nè Evà wàkamba nè: ‘Mémè ndi mupetè mwànà wa balùme wa kùdì Mukalenge.’” Cyà bushùwà menemene. Bivwa bikèngela cifuminè kùdì Mukalenge. Mukalenge ke Mufùki umwèpelè udikù. Yèyè. . . Nzambì wàkafùka dyabùlù. Aci cìdì bishi? Nzambì wàkafùka dyabùlù. Nzambì wàkafùka mwanjèlò yónsò udi mudishinde awu. Ncyà bushùwà anyi? Mòna's, cyà bushùwà. Aci civwa

ndisungula dyàbò, kí ndyèndè Yèyè to. Yèyè wàkakufùka, cyùdi wenza pa bwalu abu ncinyi? Neùlumbulwishiibwe ànu mùshindù wùm wèwùm wè wùdìbu balumbùlwishiibwe awu. Ki bwalu mbwòbù abu's. Cyà bushùwa!

<sup>138</sup> Aba bàvwa bânà bàà Nzambi, kàdi bààkadishinda kuumuka ku ngàsà nè bààkabwela mu bantu bàà lwonji aba, nè bààkapátuka nè bààlakana. Pààkamònàbo bakàji, bààkabàngata. Mòna's, bàcidi ànu mwab'ewu. Nsòmbelu wa masandi wa Àmèrikè mmùle tètè nè. . . Muntu kàyì nè Nyumà wa Nzambi to, mmufwànyine kudyàpula mwànà mu mabòkò à mamwèndè kàdi è kwangata mamwèndè ku bukole. Yèyè kàyì nè Nzambi to, kèna—kèna mwimpè kutamba nyamà to. Uçidi ànu nè ngiikàdìlù wa nyama awu, wa kàyì ùneemeka Nzambi. Nènku muntu kampàndà mwikàle nè. . . Bàdi bàmba nè ntèndeleelelu mmukubàkùle, bàmba nè bantu mbapàle bwà ntèndeleelelu. Ntèndeleelelu ke cintu cimwèpelè cidi mwà kupèèsha muntu meeji èndè mu ôwò, mbwena kwamba nè, ntèndeleelelu wa Yesù Kilistò.

<sup>139</sup> Ndi mufwànyine kujaadikila ku Bible nè kwèna nè meeji èbè majaanlème mu ôwò to paùdi kùyì mupetè Kilistò. Ncyà bushùwà. Aci's ncikolè cipangè nè mwà kukola, kàdi ndi mwà kujaadika cyòci aci ku Mifundu. Ncyà bushùwà. Udi ulwa wa lwonji, wa dyalakana, nè bikwàbò byònsò, too nè paùdi upeta Kilistò Yesù. Yèyè ke Udi mulenga awu.

<sup>140</sup> Mpindyewu, nèngùtabè nè bantu bàdi bàlonga bikolè menemene, nè bàteeta bwà kuya kule menemene, nè bàteeta bwà kwela meeji bikolè menemene, nè mîngà misangu bàdi bàpeta lungènyi lonyungùlùke nè bikwàbò ku dilonga bwà bwalu bwà Mukalenge. Nudi nè cyà kulekela kwenza nànkù! Kabyèna bikèngela bwà wèwè kwenza nànkù to. Cintu cimwèpelè cidi cikèngela bwà wèwè kwenza nkuMunanga, nè kutungunuka ànu nè kuMunanga. Amen. Kì nditeeta bwà kubwela mu cintu kampàndà anyi kudivwija cintu kampàndà cyùdi kùyì to, tungunukà ànu cyanànà nè kulekela Nzambi ùkwàta neebè mudimu mu mùshindù wùdìYe muswè awu. Udilekelele ànu wèwè mwinè, udifila wèwè mwinè nè utungunuka nè kuya, nè disànkà, wimba misambu, ucyònkómoka. Ke mùshindù ngwòwò awu.

<sup>141</sup> Bible mmwambè nè: “Maalu ònsò àdi àkwàcishangana bwà dyàkalenga dyà bàdi baMunangè,” pa nànkù ikàla ànu mutwishiibwe nè udi muMunangè, ke cintu cimwèpelè cidi cikèngela bwà wèwè kumanya ncyòci aci. Amen! Ikàla ànu muMunangè nè tungunukà! Amba nè: “Mukalenge, ndi muKunangè, Wèwè's udi mumanyè nè ndi muKunangè.”

“Udi munangè *cikampàndà* eci anyi?”

“To, Mukalenge. Wèwè ngùndi munangè, Mukalenge.”  
Nwamònu anyi?

142 Ambà tǔng: “Èè, kwèna muswè kwikala . . . Kwènàku muswè kwikala muyiishi munène anyi? Kwènàku muswè kwikala *cikampàndà* anyi?”

143 “To. Mpindyewu, Mukalenge, ncinyi . . . Wèwè muswè bwà mèmè kwikala nàнку, nèngiikalè nàнку. PaWikalà kùyi muswè to, Amen. Nèngiikalè ànu mwab’ewu, ànu mulami wa ku ciibi ku èkèleeziyà ewu.”

144 “Èè, mpindyewu, ndi ngiitabuuja nè wèwè mwenzè cintu kampàndà cyà mùshindù *ewu* bantu mmbafwànyine kwela meeji matàmbe bwímpè bwà èkèleeziyà wenu.”

145 “Cidì bantu bèèla meeji nànsha ciikàle cinyi, ndi muswè kumanya cyùdi Wèwè wela meeji, Mukalenge. Mèmè—mèmè nènshaalè ànu Neebè, cyùdi Wèwè ungambila bwà kwenza aci. Ndi mubànangè bônso, bushùwà.”

“Èè, mpindyewu, udi mumanyè Mwanèètù wa bakàji *Kampàndà*, kwèna mumunangè to.”

“Èyowà, ndi mumunangè, Mukalenge. Èyowa, ndi mumunangè cyà bushùwà. Ndi mumunangè.”

“Bwà cinyi?”

146 “Bwalu Wèwè udi mumunangè, nè Wèwè udi munda mwànyì. Nè bidi bikèngela bwà mèmè kumunanga, bwalu ng’Wèwè munda mwànyì umunangilamù.” Yoyòyò! Aci necicikumbàjè.

147 Kàdi ndi ngèèla meeji nè ayi yivwa nnyama yàkamatà muntwamu ayi, nnyama wa dyalakana wàkadishinda, nwamònu’s.

### 11. “Bàna bàà Nzambi” bàdi bàswa kuumvwija Banjèlò anyi nyumà yàkafùminà mu Dyulu ayi anyi?

148 Ke cìvwà lukonko lwà muntu awu ncyòci aci. Èyo. Mèmè ndi ngiitabuuja nè kabàvwa Banjèlò to. Nwamònu’s, bàvwa bantu, “bàna bàà Nzambi,” mùdi Mifundu yàmba amu. Kì mbaanjèlò to, bàvwa bàna bàà Nzambi. Nè bóbò bààkafùmina mu Dyulu kulwa pa buloba, nè bààkatèèkiibwa mu mubidi; kì “mbadifinyike bóbò biinè mu mubidi to,” ndi ngèèla meeji nè mubidi wónso mmulela ku disangila dyà mulùme nè mukàji pakuumusha Yesù Kilistò. Ndi ngiitabuuja nè Yèyè ke Kampàndà umwèpelè ukàadikù mulediibwe kùdi virgò, Yesù Kilistò. Nènku ncyèna—ncyèna mpetangana nè Josèphe pa bwalu abu to, pa mulongi wa maalu-malonda munène awu. Kàdi ndi ngiitabuuja cyà bushùwà nè bàvwa bantu batàmbe-mfùkulu bààkapwekà panshi nè kukòokèsha nyumà wa muntu. Nè ndi ngiitabuuja nè bàcidi ànu apa kàbidi leelù ewu, baciikàle ànu bènda banyunguluka mu Jeffersonville leelù ewu, nyumà yimwèyimwè yà ngiikàdilù wa bunyama ayi, yà dyalakana, yà kayiyi yineemeka Nzambi, bwà kusòmba ànu munda mwà bantu. Mpindyewu, dǐngà ditùkù bantu aba nebàfwe; nènku kwòkò kwikale lukòngò lukwàbò, neyilwe buludì pambidi pàabò.

149 Vùlukààyi nè, Nzambì ùtu wàngata muntu Wendè kàdi kàtu wàngatakù Nyumà Wendè to, eci n'Nyumà Mwímpè umweumwe wàkapetabò ku Mpenta awu.

150 Ndémon umweumwe awu (mu mmwènekelu ya butèndeledi) wakakèngesha Kilistò awu, ndyabùlù umweumwe udi mu èkèleeziya leelù ewu awu, ùvwàlà mìzàbì mile ayi. Nè kabyèna bikèngela bwà kuvwàlabò... Ncyèna nswa kwamba mùzàbì wà pambidi pààbò to, ndi muswè kwamba mùzàbì wà pa musùukà wèbè. Nwamònu's: "Mòna's, matùkù à bishimà àkaadi mamanè kupita, cintu bu nàнку kacitukù to." Nwènu bàdi bàakula bwà Bàfaalèsà bàà cyena leelù aba! Anu mu byòbì menemene.

151 "Biikàle nè..." Bible ùdi wamba nè: "Nebiikalè nè cimwènekelu cyà difwàna dyà Nzambì, kàdi biikàle bàvila Bukolè abu. Bàà bwena abu umùkà kùdìbo, umùkà kùdìbo. Shàala ànu ntàntà, dilamà wèwè ntàntà." Abu bàcidi ànu bàna bàà Nzambì abu, kàdi bàdi mu ngiikàdilù wà badishinde. Nudi bamòne cìndì muswè kwamba aci anyi? Bàmwè bàà kùdìbo mbayiishi, bàmwè bàà kùdìbo mbalami, bàmwè bàà kùdìbo mbakùlù, bàmwè bàà kùdìbo mbèèpiskòpò, biikàle nè kaneemu kakolè kàà ntèndeleeleu nè mwàbò mwònsò! Kàdi Bible... .

152 Mpindyewu, nèngàdamunè lukonko elu, mwanèètù, lùdi mungeelè kùkaadi katançi. Muntu kampàndà mmwambè nè:

**12. Mwanèètù Branham, ndi muswè kumanya mwaba wùndiku mwà kwelela nzàdi kwamba nè: "Muntu mulùme ewu ùdi nè Nyumà Mwímpè bwalu mmwenze 'cikampàndà,'" anyi "Mukàjì ewu ùdi nè Nyumà Mwímpè bwalu mmwenze 'cikansanga.'"**

153 Kakwènakù mùshindù nànsha wùmwe pa buloba apa bwà wèwè kucimanya to. Ncyà bushùwà. Kakwènakù mùshindù nànsha wùmwe pa buloba apa wà wèwè kucimanya to. Nzambì ke Mulumbulwishi, katwèna nè cyà kulumbulwisha to. Nwamònu anyi? Yishà wèwè ànu Èvànjeeliyò cyanààna, ikàlè nè nsòmbelu... .

154 Muntu kampàndà mmulwe kùndi mwaba ewu kùkaadi cikondo kampàndà, mvwa nyiisha pa cìmvwà mwambè dilòlò kampàndà adi aci. Kulwayè kwànyì kumbèlu è kwambayè nè: "Mwanèètù Branham, mwanèètù, ndi muswè—ndi muswè—mvwa muswè kwikala... . Ndi muswè kulekela mpèkaatù yànyì ayi. Ndi muswè kwikala mwena Kilistò." Yèyè kusòmba mu lutanda lwànyì.

155 Yèyè nè: "Mvwa mùmvwè bwà muntu munène, muntu mumanyike wa buloba bujimà dìnà dyèndè Billy Graham." Yèyè nè: "Mèmè kuya ku masangisha èndè nè—nè—nè kwambayè nè: 'Bònsò bàdi baswè kulwa beena Kilistò, elàayi cyanza muulu nè itàbaayi Kilistò bu Musùngidi wenù sungasunga.' Ke mèmè kwela cyanza muulu. Yèyè nè: 'Mpindyewu, imanyinaayi bònsò

kuulu, netùsambile.’ Nàнку mèmè kushààla kusambila ànu. . .” (mfwilaayikù luse) “nè meeji matòòke ànu nè mwànyì mwònsò.” Yèyè nè: “Nèнку, kàdi aci kî ncinkwàcishekù to.”

156 Yèyè nè: “Pashìishe mèmè kupweka ku—ku disangisha dyà Oral Roberts.” Yèyè nè: “Mèmè kuumvwa bwalu bwèndè, ke mèmè kuumvwa bàmba nè bònsò bàvwa nè disànka dyà dikèma.” Yèyè nè: “Mèmè kuya kùdi Oral Roberts nè mèmè kumukonka nè: ‘Cìndi nè cyà kwenza ncinyì bwà kulwa mwena Kìlistò?’ Yèyè nè: ‘Bwela paanyimà apu. . .’ Mèmè kumwambila nè mvwa mwelè cyanza muulu kwà Billy Graham’. Yèyè nè: ‘ Wèwè shààla ànu mu cibambalu cyà malòmba amu too nè pawikalà nè disànka ufika too nè ku dyakula dyà mu myakulu.’” Yèyè nè: “Mèmè kubwelamù nè kusambila too nè pangààkaakulà mu myakulu.” Yèyè nè: “Ndi mupàtùke, kaciyì cinkwàcishe nànsha kakesè to.”

157 Yèyè nè: “Ke pashìishe mèmè kuya ku disangisha dikwàbò kàdi bòbò kungambila nè ncìvwa mwànji kujidiibwa to, bòbò nè: ‘Ndi nè cyà kujidiibwa nè kupeta disànka nè kwela mbilà, kupeta disànka dyàbùngi.’ Ki mèmè kusambila kusambila too nè pangàà—pangààkeela mbilà.” Yèyè nè: “Nànsha nàнку. . .”

158 Mèmè nè: “Mwanèètù, cyònsò cyà ku bintu abi cìdi cijaalàme, cyònsò cyà ku byòbì abi ncimpè. Kwela cyanza muulu, kwakula mu myakulu, kwela mbila, ndi ngìtabuuja kantu nè kantu kàà ku cyòci aci, kàdi nànsha nàнку aci kî ncintu to. Nwamònu’s, nkwitaba Mupèrsonà awu, Kìlistò Yesù.” Nwamònu anyi? Nwamònu’s, kî. . .

159 Bintu ebi mbyambiùbwà. Dyela dyà mbilà, dyakula dyà mu myakulu, dinyeema, dyela dyà mbilà, didila dyà myadi, kusambila, nî ncinyì cyònsò, abi’s bìdi ànu byambiùbwà cyanaàna bìdi bilondà. Cintu cyà kumpàlà ncyà kwitaba Mupèrsonà awu, Kìlistò Yesù. Nwamònu anyi? Pa nàнку kakwèna—kakwèna cileeji nànsha cìmwè citùdi mwà kwamba to. Bwalu muntu ùdi wèla mbilà anyi? Nkààdikù mumòne muntu ùdila mwadi ùdila mwadi, ùdila binsònji byà ngandù, nè mucìikàle ànu ngènzàmpèkààtù ànu nè mwèndè mwònsò.

160 Tèelejààyi, Yesù mmutùfwànyikije nè mìkòòkò. Ncyà bushùwà anyi? Mulami wa mìkòòkò mmumanyè mìkòòkò yèndè. Kùdikù muntu mwab’ewu ukààdikù mutèeleje mwadi wà mbùji anyi? Èè, mwanèètù, mbìmpè wikalè mulami wa mìkòòkò pawikalà muswè kumanya dishiilangana. Mbuji neàdillè menemene ànu bu mùkòòkò. Uh-huh. Lekèlè mbùji mukèsè wa kale wa mpumbwa àkajìngàkàne mwaba kampàndà, nè mùkòòkò mukèsè ku lusekè kampàndà “Beee,” nè pashìishe “Beee,” ànu mùshìndù wùm wèwèwèwè.

161 Nèнку nkààdi mubuumvwe kwìnshì kwà cyoshelu bàdila ànu kudila nè: “Éyi Nzambi!” bàshìkunkila ànu mùshìndù awu, “Éyi Nzambi!” pèndè mbùji díbà dyònsò. Ncyà bushùwà. Dyela dyà mbilà anyi? Èè, ekèlekèle, mèmè’s nkààdi mubàmòne

bèèla mbilà too nè pàdibo ànu . . . nè bànyeema lubilu bàbànda bàpweka bèèla mbilà.

<sup>162</sup> Mpindyewu, wèwè udi wamba nè: “Mwanèètù Branham, kwèna witabuuja dyela dyà mbilà to!”

<sup>163</sup> Kanùngumvù bibi to. Bushùwà’s, ntu ngùitabuuja dyela dyà mbilà. Kàdi ndi ngàmba nè aci kí ncileeeji to, nwamònu’s, bwalu bònsò bàbidi bàdi bàdila myadi. Nkaadi mubàmòne bèèla mbilà mikolè nè mwàbò mwònsò mùvwàbo mwà kwela mbilà amu. Èyowà’s, mukalenge. Nè bènza ànu maalu à lukutukutu mùshindù awu, nè kùtu ntàntà mule, nudi bamanyè cìndi ngàmba aci. Nkàadi mubuumvwe bààkula mu myakulu, bàpàtuka kàdi biikàle nè nsòmbelu wa mùshindù kanà wònsò, bènza ànu cintu kanà cyònsò. Aci kacivwa cimanyinu to.

Kàdi wèwè udi wamba nè: “Wèwè’s udi ubèngangana naaci.”

<sup>164</sup> To, kí nnànkù to. Mémè ndi ngùitabuuja dyakula dyà mu myakulu, ndipà dyà Nzambì mu èkèleeziyà. Mémè mwà kucyumùsha, ndi mwà kuumusha citùpà cyà Nzambì. Mémè muumùshe ludimi lwànyì—ludimi lwànyì ku mubidi wànyì ewu, ncyèna mufwànyine kupeta mubidi mukùmbànàngàne to. Mubidi wà Yesù Kilistò wùdi nè myakulu mu Wòwù. Mubidi wà Yesù Kilistò mwab’ewu wùdi nè myakulu; nènku wèwè muyumùshe, udi muumùshe citùpà cyà Kilistò. Kàdi kwèna ànu mwà kwamba nè aci ke Mubidi awu to, nwamònu’s. Nwamònu anyi? Nwamònu anyi?

<sup>165</sup> Kàdi nkwitaba Mupèrsònà awu, Kilistò Yesù, nè bintu bikwàbò ebi bìdi bìlwa buludi nè bìdi bikùmbanangana. Cidimba cyònsò mu mubidi ewu mu dindà emu, kasùmbù kakese kàà bantu aka, bu twètù mwà kukòka maaridò ku luseke nè ku luseke lwònsò nè muntu yònsò mwab’ewu wàkidila Mupèrsònà awu, Kilistò Yesù, kakùvwa kufwànyine kwikala matàndu anyi kakùvwa kufwànyine kwikala dikòkangana nànsha. Kùvwa nè cyà kwikala ànu dinanga dipwàngàne. Kàdi pèèbè’s udi ànu mufwànyine kwitabuuja *cikampàndà* nè kwitabuuja *cikansanga*, kàdi’s ncifwànyine ànu kwikala cyùle tètè nè dinanga mu mùshindù wà wèwè mufwànyine ànu . . . Nwamònu anyi? Ke cyòci aci. Mpindyewu, Yesù wàkamba nè: “Ku mamama àbò nkunwàbàmanyinà.” Nè mamama à Nyumà àdi dinanga, disànka, ditalala, mwoyi mule, bwîmpè, bupòle, musàngèelu.

<sup>166</sup> Mpindyewu, nêngùikalè mwà . . . Nènnùpèèshè dyànyì dicinka dyà cìndi ngèèla meeji nè ncintu cìdì pabwìpi menemene nè cileeeji, nè muntu kampàndà mmwena Kilisto, kutàmba cintu kanà cyònsò cìndi mumanyè. Nudi bamanyè cidici anyi? Mmudimu wà musùukà. Muntu utu misangu yònsò ànu nè nzala nè nyòòtà yà Nzambì. Bàdi ànu . . . muunya nè bufùku, kabèèna—kabèèna ànu mwà kucitwàla to. Bìdi—bìdi—bìdi bìkèngela bwà kwenzabò cintu kampàndà bwà Nzambì. Bòbò—bòbò mbùle

tèntè nè dinanga nè bàdi ànu . . . mudimu wà musùùkà, mwikàle ànu ùkwàta mudimu díbà dyònsò. Bible mmwambè nè: “Ewu udi upàtuka wènda ùmyamina nè binsònji kakùyi mpatà to yéyè neàpinganè cyàkàbìdì, wènda ùcyònkomoka, ùtwàla myepu yà mushinga mukolè.” Ncyà bushùwà anyi? Bintu byònsò abi.

<sup>167</sup> Mpindyewu, tàngilàayi, piikalàku . . . Piikalà èkèleeziyà ewu . . . Bu mémè mwà kwamba, mu dindà emu nè, kasumbù kàà bantu aka nè mémè . . . Nè Nzambì wàmba nè: “Mpindyewu, tàngilà, William Branham, Nénkufikishè ku dyandamuna bwà kasumbù kàà bantu aku, cyùdì ubàmbila aci. Mpindyewu, udi muswè bwà bònsò kwelabò mbilà anyi?”

“Bushùwà, ndi muswè bwà kwelabò mbilà.”

“Udi muswè bwà bònsò kwakulabò mu myakulu anyi?”

“Ndi muswè bwà yònsò wa kùdìbo àkulè mu myakula.”

“Udi muswè bwà bònsò kujàbo maja mu Nyumà anyi?”

“Ndi muswè bwà yònsò wa kùdìbo.”

<sup>168</sup> “Èyo, èè, abi’s mbìmpè byà dikèma, kàdi cyùdì muswè bwà bòbò kwenza kumutù kwà aci cinyi?” Uh-huh.

<sup>169</sup> “Mbipicìibwe nè mémè mwikàle nè èkèleeziyà uvwa nè bujitu pa mwoyi wèndè bwà disambila mu mùshindù wà nè bàvwa mwà kushààla ànu ku cyoshelu eci nè bafwànyine kwikala apa muunya nè bufùkù, nè bikwàbò byònsò; nè mu nzùbù mwàbò, bàvwa díbà dyònsò ànu mu disambila, nè badìpwekèshe, nè bàteeta bwà kufikisha bantu ku dilwa kùdì Nzambì, nè bènza mabiikila ku lùpitaadi nè bàsàmba babèèdì, nè bàteeta kufikisha bantu ku dilwa mu èkèleeziyà nè kwenza maalù mimpè. Mbipicìibwe nè mémè mwikàle nè aci pamutù pàà bikwàbò byònsò bitwàngaja pàmwè; nànsha mùdìbi nè bikwàbò mbìmpè amu, mbyà mu èkèleeziyà.”

<sup>170</sup> Kàdi bu nè mémè mvwa naaci, mvwa mufwànyine kutèèka cyòci aci dyàmbedi. Bwalu wèwè mwikàle nè cyòci aci, cikwàbò necyènzekè. Uh-huh. Nwamònu anyi? Wèwè mwikàle nè cyòci aci, wèwè mwà kufika ku diikala nè nzala menemene bwà Nzambì, dyela dyà mbilà nedyènzekè. Wèwè nè nzala yàbùngì bwà Nzambì, dyakula dyà mu myakulu’s nedyènzekè. Wèwè mupepè nzala yàbùngì bwà Nzambì, nè mutùngùnùke ànu nè kwikala nè nzala, shààla mulamè eci. Wèwè mudimòna wèwè mwinè kùciyi ucyùka myandà, wàvùlukà ànu nè, wàdimuka, kùdì nyumà mukwàbò munkaci mwà kuteeta bwà kukwàta mudimu munda amu; Shààla ànu kumpàlà kwà Nzambì, mudìpwekèshe, mwikàle nè mudimu wà musùùkà. Ikàlà ànu . . . ikàlà nè cyena-kale cìmpè . . .

<sup>171</sup> Ndi mwà kujaadikila kù Bible nè “Musangu wà kumpàlà wùvwà Mwanjèlò wa Nzambì mupicìile mu matùnga bwà kutwà citampì nè Nyumà Mwìmpè, Wàkatwà citampì ànu aba bàvwà bàdila myadi nè bàtwa mikèmu bwà binyangu byàkenjiibwa mu

cimenga,” Yèhezèkèlè, nshapità wa 9 awu. Ncyà bushùwà anyi? Kutwà citampì pa mpàlà pàà aba bàdì bàtwa mìkèmu nè beela mbilà bwà binyangu bìdì byènjiibwa mu cimenga.

<sup>172</sup> Mpindyewu, ndi muswè nnwelèku lukonko, nènnwèlè lukonko elu. (Mpindyewu netujikijè nè lùkàsà lwònsò.) Ncinyi cìvwàku cìfwànyìne kwenzeka leelù ewu bu Nyumà Mwîmpè mwà kupìcila mu Jeffersonville, mu New Albany, nè mu Louisville, bwà kutwà citampì mu mapingaja amu abu bàdì bafwànyìne kwikala kumbèlu nè: “Nzambì, tùmakù ditàbuluja, biikàlè ànu nè nzala menemene bwà disangisha kampàndà. Éyì Nzambì wa yààya, tàngilà mpèkaatù yà cimenga. Kaa, kabýènakù byènza bwòwà anyi, Nzambì? Kaa, kWènàku muswè kutùma ditàbuluja anyi, Nzambì? Tùmakù muyiishi kampàndà mwîmpè, tùmakù muntu kampàndà. Éyì Mukalenge, lekèlaku Nyumà Mwîmpè. . .” Mpenyì—mpenyì pàdìYe mufwànyìne kutwà citampì? Anji elààybì meeji ku bwalu abu.

<sup>173</sup> Mpindyewu: “Èè, Mwanèètù Branham, udi uswa kwamba bishi?”

<sup>174</sup> Ndi nswa kwamba eci, nè ndi ngàmba eci nè kaneemu kààbùngì, ngèndela pa mândà àdì mwà kukòseka. Ndi ngiitabuujà nè ditùkù adi dikaadi pabwîpì nè kujika, bàdì babwèlè mbabwèlè. Nwamònu anyi? Nwamònu anyi? Biibi bìdì munkaci mwà kukàngika pàmwè, kakùcyèna kàbìdì bujitu abu to.

<sup>175</sup> Billy Graham ùwà nè masangisha mu ditùnga dijimà, nè Oral Roberts, nè bakwàbò bònsò bàà kutùdì abu. Tudi beelè mbilà, nè basambile nè basambile, nè bikwàbò byònsò. Kàdì, nudi numòna’s, biibi bìdì munkaci mwà kukàngika. “Ewu udi mukooyike,” ndi ntèèla Mufùndu, “àtungunukè ànu nè kwikala mukooyike. Ewu udi mwakàne, àtungunukè ànu nè kwikala mwakàne. Ewu udi wa cijila, àshaalè ànu wa cijila.” Nè mèmè ndi ngiitabuujà nè biibi byà bàà Bisàmbà byà bendè bìdì munkaci mwà kukàngiibwa pàmwè. Nwamònu anyi? Ditùkù dyà cikondo cyà movù dikaadi ànu dyàmba kujika, nkushààle ànu ndambù mukèsè udi nè cyà kubwela. Kabingilà kàdì kènza nè kanwèna mwà kupeta kàbìdì disangisha dyà bwena adi to, kakwèna byà mudimu wà musùukà abi to. Kanucyèna—kanucyèna nupeta bujitu abu to.

<sup>176</sup> Ndi mvùluka kùkaadi bidimu. Nutu misangu yònsò ànu nubàtèèleja bàmba bwà tujila twà bisòtà byà mabaya nè bikwàbò mu tabernacle amu. Aci kacýakacýènza citàmbidìle to, nànsha kakesè. Kàdì dîbà adi cìcìvwà cibishi, Nzambì ùwà ùbìikila Èkèleeziyà Wendè. Mvwa mubàmòne bàshikunkila nè bàdila mwadi nè bàlààla ku cyoshelu eku bufùkù bujimà. Nkàdì muyè ku nzùbù yàbò, kàdì’s uvwa mwà kubùumvwa paùvwà ufìkakù, ànu mu wabò. . . mu nzùbu wabò wa bulààlu, balùme nè bakàjì, munkaci mwà kudila myadi, “Éyì Nzambì!”

177 Udi mufwànyine kubàmòna bàpìcila mu èkèleeziyà, nè mvwa mmòna pyàno ùbanga kwimba nè: *Yesù Ndamè Pabwìpì Nè Nkùrusè*, nè binsònji bipweka kuntwaku, nudi bamanyè's. “Snif, snif, snif, snif, snif.” Ubwela mu èkèleeziyà *ewu*, pashiishe upweka ku èkèleeziyà mukwàbò, nè ubatèelejamù, *Kùdi Mpokolo wa mushinga mukolè*. “Èyi Nzambi, sùngilàku mwanàanyi wa balùme. Sungilàku mwanàanyi wa bakàji, mmujimine, Mukalenge. Bu wèwè mwà kuswà!”

178 Kanwèna nucìpeta kàbìdi to. Bwalu bùdi bìshi? Nyumà wa Nzambi mmudìkòke paanyimà. Yesù wàkamba, wàkadyànjila kwamba eci nè, dinanga adi . . . bwalu dinanga dyà bààbúngì . . . dinanga dyàbò nedìpangilè. “Nè bwalu bubi nebùvulanganà, dinanga dyà bààbúngì nedìpangilè.” Nwamònu anyi? Nwamònu's, dikwàta mashìka, dìya. Dinanga didi munkacì mwà kufwà kubùtuka. Kàdi ncinyi cidìbo naaci mu cyòci aci? Ànu mmwènekelu; byanza bibànda bipweka bituuta pyànò, bikolè byètù byà menemene ebi, nè kwela mbilà nè: “Butùmbi kùdi Nzambi! Àlèluuyàh! Amen! Nzambi àtumbè!” Nwamònu's, mùshindù awu, cidi ànu mmwènekelu. Lekèlaayi kudishìma, nwamònu's, biikàle ànu nudìdinga nkààyeenù. Nwamònu's, tèèlejàayi, mwanèètu, too nè patwìkalà . . . Ndi nya mùshindù *ewu*, ndi ngàakul- . . .

179 Ncyèna ngàakula bwà tabernacle wetù *ewu* to, ndi ngàakula bwà cìndi nsangana mu nyùngulukilu wa Ètats-Unis. Ncishààle ànu mmwènekelu kampànda, ànu bu kutentula citùvwà naaci kale. Kàdi mudimu wà musùuka awu, mmwenzè ànu bu mujikè. Kaa mwanèètu wa balùme, mwanèètu wa bakàji, (Nzambi, ikàlàku neetù luse) Nzambi àfwekù luse!

180 Tàngilàayi matàbuluja aa nè bikwàbò ànu kutuuta nè kutuuta nè kutuuta, nè Èvànjeeliyò ùyiishiibwa bitàmbe kutòoka, cidi . . . Citàngilaayi leelù *ewu*, pàdi ànu ditàbuluja dìjika, pàabò bàya. Nudi bamanyè mùdi bwalu anyi?

181 Lekèlaayi ngàmbe eci. Ncyèna mumanyè nè mbwà cinyi ncyèna mwà kuseesuka ku eci to. Kàdi, tàngilàayi, Yesù wàkamba nè: “Bukalenge bwà mu Dyulu mbufwànàngàne nè muntu wàkangata bukòndò è kubwèla mu mbù. Nènku pàakabùpàtulàye, wàkakwàta mìshindù kabùkabù yà nyama yà mu mbù, mu bushùwà bwà bwalu. Wàkakwàta nkùvù, nè wàkakwàta nyòka, nè wàkakwàta nshishà, bìshiishì, mishipa. Nwamònu anyi? Nè ndi ngèela meeji nè bukòndò . . .

182 Mpindyewu, tàngilàayi! Ke nkùvù *ewu*, nè ke mushipa *ewu*. Nkùvù awu kèna nè cidìye mwà kwenza to bwalu nè yèye nkùvù, yèye ùvwa nkùvù ànu kwìnè kwònsò aku. Ngiiakàdìlù Wèndè yèye nkùvù nè ke cyònsò cìvwàku pa bwalu abu ncyòci aci. (Mpindyewu vùlukaayi nè, nga—ngambi nè nènsambilè.) Nwamònu's, yèye ùdi nkùvù ànu kwìnè kwònsò aku, yèye ùdi nkùvù mpindyewu. Yèye ùdi nyòka ànu kwìnè kwònsò aku, yèye

nnyòka mpindyewu. Yèyè ùdi cìshiishì cyà mu mâyi ànu kwìnè kwònsò aku. . .

<sup>183</sup> Nè ndi ngiitabuuja nè bukòndò mbwediiibwe nè bwediibwe nè bwediibwe, too nè mùkaadi mishipa pàmwè nè yònsò myumùshiiibwe mu dijiba amu.

<sup>184</sup> Ke bwà cinyi bàdi bàmba nè: “Èè, mvwa mwelè byanza byànyì muulu. Butùmbi kùdi Nzambi’s wè! Ndi muswè kusùngidiibwa. Mukalenge àtumbè!” Ke paanyima pàà ndambwè wa matùkù: “Kaa, Lydia, udi mumanyè nè bintu abi mbyà lukutukutu’s.” “Ngèèla meeji nè cìvwa cyà bushùwà.” Bwà cinyi? Ngiikàdilù udi *mwab’ewu* ncìshiishì cyà mu mâyi kwìnè kwònsò aku; cìvwa nnyòka, kwìnè kwònsò aku.

<sup>185</sup> Mishipa mmipàtula pàmwè nè yònsò mu dijiba mpindyewu; Bukòndò nebùùmishiibwè. Nè Yesù neàlwe, Yèyè neàbweje mishipa Yèndè dībà adi. Nudi bumvwè cìndi muswè kwamba aci anyi? Kaa, kòkù kwikàle katòba kàmwè kàà bwena Kilistò mundà mwèbè amu, kòkù kwikàle katòba kàmwè kàà dijinga bwà wèwè kusadila Nzambi, kàkwàtà ànu ncyoncyoncyo nè mwèbè mwònsò mu dindà emu nè ùkeengèlèkè nè mwoyi wèbè wònsò.

<sup>186</sup> “Bànà bàà Nzambi bàakangatà bàna bàà bakàji bàà bantu abu.” Ncyà bushùwà nè bòbò bàvwa bàna bàà Nzambi. Leelù ewu bòbò bàcidi ànu bàna bàà Nzambi, kàdi mbàna bàà Nzambi badishinde. Bàmwè bàà kùdìbo, bilondèshìle Mifundu, yoyòyò! Mùshindù wùdìbo mwà kwakula Mufundu’s wè! Bòbò mbàna bàà balùme bàà Nzambi. Nudi bamanyè’s, Sàtaanà ùvwa muntu wa dibòkò dyà bukolè dyà Nzambi. Nudi bamanyè’s, yèyè mmumanyè Mifundu kupita mwena tèlòlòji yònsò—mwena tèlòlòji yònsò—mwena tèlòlòji wa pa buloba leelù ewu. Udi wakula bwà. . . Yèyè’s ùdi ùtònkola maasèminère, nangàngà Baptiste kampàndà ewu kaaba aka udi wamba nè “Yesù Kilistò wàkalediibwa kùdi disàlaayi dyà beena Loomò, anyi disàlaayi dyà cyena Allemagne.” Ndi nè mukàndà pa cyòci aci, ndi muswè kunùleejawù òmwè dyà ku matùkù àdi pànshì aa. Èyo.

<sup>187</sup> Nè lùkàsà lwònsò, Ekèsòòdè. . . Kaa, katùvwakù bafwànyine kupeta aci to patùdi katùyì baalùje. Nényangàtè nè lùkàsà lwònsò mpindyewu, ndi mumanyè nè ndi munkaci mwà kwangata dībà dyènu dyàbùngi be. Nudi nuntwàlaayikù bònsò katanci kakesè cyanààna anyi? [Disangisha didi dyàmba nè: “Amen.”—Muf.]

**13. Binunu lukàmà nè makùmi ànaayi nè binaayi abi, bìdi bitèediibwe mu Bwàkabuulwibwà, bàshàadilè bàà beena Yuda batùdi. . . nebiiikalè mu Dyambwibwa dyà Èkèleeziyà anyi? (kudìmunà dibèji) Kí ng’Izàlèlèlè, wa ku cibangidilu cyà. . . bàakabanga. . . (Mfwilaayikù luse). . . ùbwela mu cikondo—cikondo cyà. . . ?**

188 Mfwilààyikù luse, mpèèshaayikù kasunsa kàmwèpelè cyanààna too nè pàndi mwà kumòna cìdici. Nci—ncishindika, ncishindika citùbùla nè dibèji adi.

**...bwà kwenzekabi munda mwà bidimu cinunu byà—byà Kilistò ebi's wè kutàmba mùdi muntu awu mwà kwikala nè mwoyi, mùdi beena-ntèdeleelu bàà cyena-leelù aba bàtwàmbila anyi? Èyowà's, mukalenge.**

189 Mpindyewu, indilaayi kakesè, bwà kuumvwa elu bìmpè. Lukonko lùdi nè:

**Binunu lukàmà nè makùmi ànaayi nè binaayi abi, bitùdi twètù bàshààdilè bààbì...?**

190 Ndi muswè kwanji kutulongolola twètù biinè pa lwôlù alu kumpàlà, ànu bwà kwikala mutwishìbwe nè nwènù... Nwamònu's, binunu lukàmà nè makùmi ànaayi nè binaayi abi...

**Binunu lukàmà nè makùmi ànaayi nè binaayi, bìdi bitèèdiibwe mu Bwàkabalwibwà abi, bàshààdilè bàà beena Yudà bu mwikalebù citùpà cyà Dyambwibwa dyà Èkèleeziyà anyi? Binunu lukàmà nè makùmi ànaayi nè binaayi abi bìdi...?**

191 Mpindyewu, ànu...Ndi—ndi...Ndi muswè kuumvwa eci citòòke mu meeji ànyi kumpàlà kwà mèmè kukùtulungana naaci.

**Binunu lukàmà nè makùmi ànaayi nè binaayi, bìdi bitèèdiibwe mu Bwàkabuulwibwà abi, bàshààdilè bàà beena Yudà bìikale mu Dyambwibwa dyà Èkèleeziyà anyi?**

192 Ndi muswè kwanji kupeta aci dyàmbedi. Binunu lukàmà nè makùmi ànaayi nè binaayi abi mbàshààdilè bàà beena Yudà, kàdi kî ng'Èkèleeziyà mwambwibwe to. Nwamònu anyi? Tàngilàayi mpindyewu mu Bwàkabuulwibwà amu, nshapità mwi6, nenùmonè cyòci aci.

193 Pashìishe netwàngatè citùpà cìkwàbò aci pa lukwàbò—lukwàbò luseke nènku bàdi nè lukonko lukwàbò mwòmò amu. Mònaayi bintu ebi.

194 Èyo, tàngilàayi kùnweku mpindyewu, mu Bwàkabuulwibwà 6, mpindyewu, ke mwaba wunùdi nucìpetela ngwòwò awu. Nwamònu anyi? Mpindyewu, netùbangè, ùdi ùtúngunuka nè wàkula bwà babàndi bàà pa tùbalù, nè bikwàbò, ùtúngunuka. “Pààkakàngulàbo kùdi...” Twàngatàayi mvensà wa 9 wa nshapità mwi6 wa Bwàkabuulwibwà:

*Nènku pààkakàngulàye cìtampì ciitànù,...*

195 Ndi—ndi—ndi mutùpàkàne, ndi mu nshapità wa cyanààna. Nnshapità wa 7:

*...paanyimà pàà maalu aa ngàkamòna banjèlò bànaayi bìimàne ku ntengu yìnaayi yà buloba,...*

196 Kaa, lukonko bulenga kaayi's wè, nè ncikondo cikesè kaayi's bwà kubwelamù nè kusambidila babèèdi.

*...paanyimà pàà maalu aa ngákamòna banjèlò bànaayi biimàne ku ntengu yinaayi yà buloba, bakwàte mpeepèlè yinaayi yà buloba, bwà lupeepèle kalùlù kutuuta pa buloba to, anyi pa mbù, anyi pa mucì kanà wónsò.*

*Nè ngákamòna mwanjèlò mukwàbò ùpweka ùfùmina mu dyulu, mwikàle nè citampì cyà Nzambi udi nè mwoyi: . . .*

197 Kaa, ikàlaayi batwishibwe nè, elu ndukonko lulenga lwà dikèma. Nwamònu anyi? Mpindyewu, tângilàayi nùmonè cimfwànyì cyà cikèmesha; Yone mmwambè mpindyewu, apa. . . kule nè buloba mpindyewu, mu Nyumà, mwikàle ùpingaja mèsù paanyimà pa buloba. Nè yèyè wákamòna banjèlò bànaayi biimàne ku ntengu yinaayi yà buloba, bakwàte mpeepèlè yinaayi yà buloba.

198 Mpindyewu, “mpeepèlè,” mu Bible. . . Ncyèna nè díbà dyà kunùbadila Mifùndu to. Kàdi tudì mwà kufika ku lwólù elu. Lwólù kalùyì lwandàmùnyìibwa mu mùshindù mujaalàme to, díbà adi nèndwängàtè mu cikondo kampàndà cikwàbò. Yinaayi. . . *Mpeepèlè*, mu Bible, yidi yùmvwija “mvità nè dikòkangana.” Bu mu cikondo cyà Yobò, nudi bavùlùke nè, bipeepèlè byàkapweka panshì nè—nè kwangata bàna bàà balùme abu. Kàdi's nudi bamanyè cìndì muswè kwamba aci, cìdi—cìdi—cìdi ndululu. Nwamònu anyi?

*...nèku ngákamòna banjèlò bànaayi (banjèlò bànaayi, anyi “baamisànjeelà bànaayi”), bàvwa biimàne ku ndekeelu kwà. . . anyi ntengu yinaayi yà buloba, bakwàte mpeepèlè yinaayi ayi. . .*

*... nè yèyè wàkeela lubilà lukolè kùdi banjèlò bànaayi abu, bàvwàbo bapèèshe bukòòkeshi bwà—bwà kuenzela buloba nè mbù bibì. (Mpindyewu, aci's ke dilwa dyà Mukalenge ndyòdì adi, didiye wàmba adi. Nwamònu anyi?)*

*Wàmba nè: Kanwènzèdi buloba bibì to, anyi mbù, anyi micì, too nè patwàtwà basadidi bàà Nzambi wetù citampì pa mpàla yàbò. (Basadidi.)*

199 Mpindyewu, vùlukàayi nè, Èkèleeziyà kí mbasadidi Bèndè to. Twètù tudì bàna Bèndè, kí mbasadidi Bèndè to. Mwena Yudà ùtu misangu yònsò ànu musadidi Wèndè. Èkèleeziyà kacya kàtu mwànji kwikala basadidi Bèndè to, Yèyè ùtu bàna Bèndè. Nwamònu anyi? Basadidi:

*Ki mèmè kuumvwa búngì bwà aba. . . bààkatwibwa citampì: nèku bààkatwibwà citampì bàvwa binunu lukàmà nè makùmi ànaayi nè binaayi bònso bàà*

*bisàmbà byà bânà bàà Izalèèlà.* (Mpindyewu, tàngilàayi, bônso mbeena Yudà.)

<sup>200</sup> Mpindyewu tàngilàayi! “Bàà cisàmbà cyà Yudà bààkatwibwà citampi bàvwa binunu dikùmi nè bibìdì. Cisàmbà cyà Luubènà, binunu dikùmi nè bibìdì. Cisàmbà cyà Gádà, binunu dikùmi nè bibìdì. Aser, binunu dikùmi nè bibìdì. Nè bàà mu Nefàtali, binunu dikùmi nè bibìdì, nè—nè bidì bilonda. Simeònà, dikùmi nè bibìdì. Nè Aser, dikùmi nè bibìdì. Nè Zabùlònà, dikùmi nè bibìdì. Nè Benyàminà, dikùmi nè bibìdì.” Nènku bisàmbà dikùmi nè bibìdì byà Izalèèlà, pa nàнку dikùmi nè bibìdì misangu dikùmi nè ibìdì. . . ncinyi? Binunu lukàmà nè makùmi ànaayi nè binaayi. Mpindyewu, tàngilàayi, bisàmbà byònsò byà bânà bàà Izalèèlà abi. Mpindyewu tàngilàayi, bôbò abu bàvwa “basadidi” bàà Nzambi.

<sup>201</sup> Mpindyewu pàmwàpa ndi mwà kutookesha cyôci eci. Mpindyewu tàngilàayi:

*Paanyimà pàà bwalu ebu . . . mònaayi, nè, tàngilàayi, nènku mèmè kumòna musùmbà munène wà bantu, wùvwà muntu nànsha umwe kàyi mwà kubala to, (mpindyewu, ewu’s mmusùmbà mukwàbò, nwamònu’s) wà matùngà ónsò, . . . bifuku byònsò, . . . myakulu, nè bantu, biimàne kumpàlà kwà nkwasà wa butùmbi, nè kumpàlà kwà Mwànà wa mùkòòkò, biikàle nè bitòòke. . . biikàle nè . . . Mwànà wa mùkòòkò, bavwàle mìzàbì mitòòke, nè malala mu byanza;*

*Ke kwelabò mbilà nè dīyi dikolè, bamba nè: . . . (Tèèlejàayi disangisha dyà Nyumà Mwimpè edi’s!) . . . Lupàndù kùdì Nzambi wetù udi musòmbe pa nkwasà wa butùmbi, nè kùdì Mwànà wa mùkòòkò.*

*Nè banjèlò bônso . . . banyùngùlùkile ku—ku nkwasà wa butùmbi, nè pàmwè nè bakulù nè bifukùbwà binaayi abi, . . . bààkapòna kumpàlà kwà nkwasà wa butùmbi batwè mpàla panshì, nè bààkakuukwila Nzambi,*

*Bàmba nè: Amen: Dibènesha, . . . butùmbi, . . . lungènyì, . . . kusàkidila, . . . luumù, . . . bukolè, . . . ngulu, bìkalè kùdì Nzambi wetù kashidi nè kashidi. Amen.*

*Nènku umwe wa ku bakulù abu . . . (Mpindyewu, tàngilàayi mpindyewu, aci cìvwa . . . Yone ùvwa mu cìkèèná-kumòna) . . . umwe wa ku bakulù abu kwambayè nè . . . kungandamunayè, kungambilayè nè: Aba mbanganyì . . . (Mpindyewu, Yone ùvwa mwena Yudà nè wàkamòna bisàmbà dikùmi nè bibìdì byà Izalèèlà, yèyè’s wàkabimanya) . . . Kàdi mbanganyì bàdì bavwàdika mìzàbì mitòòke aba? nè bàdì bàfùmina penyì? Mbafùmine penyì? Mpindyewu, udi mumòne beena Yudà, udi mubàmányè muntu nè muntu, udi mubàbadike mu bifuku nè mwambè búngì bwà binunu*

bìvwà bitwìbwe citampì. Kàdi aba mbanganyì bàà mu cifuku cyònsò, mwakulu, nè ditùnga? Mbafùmine penyì?

*Ki mèmè kumwambila nè: Mukalenge, wèwè's udi mumanyè. (Yone, mu ngaakwilù mukwàbò nè: "Ncyèna mumanyè kùdìbo bafùmine to. Mèmè ndi mwena Yudà nè ndi mwimàne kaaba aka, nè ndi mmòna cyànyì—cyànyì cisàmbà nè mmòna bàdì kaaba aka aba.")... Ke yèyè kungambila nè: Aba mbàdì bapàtùkile mu dikèngà dinène,... (Nwamònu anyi?)... dikèngà dinène, nè basukùle mizàbì yàbò, nè bayitòòkèshe mu mashi (kì mbuumambala bwà èkèleeziyà to), kàdi mu mashi à Mwànà wa mùkòòkò. (Nwamònu anyi?)*

*Ki bwà cinyì bàdì bàsanganyibwa kumpàlà kwà nkwasà wa butùmbi wa Nzambi, nè bàmusadila muunyà nè bufùku mu ntempèlù:...*

<sup>202</sup> Mpindyewu, Màndàmù Branham ùdi ùnsadila penyì? Mu nzùbu. Ke Mukàjì-musèla nyàwù. Màndàmù Neville, ke mwaba wùdìye ùsòmbela's, mu nzùbu, ùkusadila. Ke mwaba wùdì Mukàjì-musèla usanganyibwa awu, kì mbasadidi to, Mukàjì-musèla.

*...ùsadila...mu ntempèlù, nè bòbò...udi musòmbe pa nkwasà wa butùmbi neàsombè naabò.*

*Nè kabààkuumvwa kàbìdì nzala to,... (Bààkapangilakù ndambù wa byàkudyà, bìvwà bimwèke nànkù (kì mmwòmò anyi?) pàvwàbò pànu apa)...kabààkuumvwa kàbìdì nzala to, anyì kabààkwikala nè nyòòtà...anyì muunyà kawàkubwòsha to, nànsha luuyà lukolè.*

*Bwalu Mwànà wa mùkòòkò udi munkacì mwàbò awu ngwabàlombola nè kubàdìisha, nè neàbàlombòlè ku—ku àdì nè mwoyi... (katanci kakesè cyanààna)...mpokolo yà màyi àdì nè mwoyi: nè Nzambi neàkupulè...binsònji byònsò (awu mmusumbà wùdì wùdila mwadi wùdì mubwelèmu) ku mèsù kwàbò. (Nwamònu anyi?)*

<sup>203</sup> Mpindyewu, mònaayi, bàvwa nè nzala nè nyòòtà, nè bàdila myadi, bàtwa mikèmu nè bàsèngeleelangana, bààkapàtuka mu dikèngà dinène (kwambabò nè: "Tàngilàayi musumbà wà bansantu babùnguluki bàà mu malaba wàwa, kaa, s'mbapàle!"). Kaa, èkèlekèlè! Èyowà's. Nwamònu anyi? Kàdi bààkeela mbilà bàsèngeleela, kabàvwa bàkòkangana nè bàbinduluka to. Nènku bàvwa ànu bàdila myadi nè bàsèngeleela. Kàdi, nwamònu's, nènku bàvwa bifuku, myakulu, nè matùnga.

<sup>204</sup> Mpindyewu, binunu lukàmà nè makùmi ànaayi nè binaayi abi, abu bàvwa mbeena Yudà. Abraham ùvwa musadidi wa Nzambi. Beena Yudà bàtu misangu yònsò ànu basadidi bàà

Nzambì. Bàà Bisàmbà byà bendè kacya kabàtukù banjì kwikala musadidi Wendè to.

<sup>205</sup> Mpindyewu, bikèngela ànu bwà ndwijakajèku bwà kujikija elu mpindyewu, bwalu tudi nè mikwàbò yìbìdì anyì yìsàtù. Nènku nèndwijakajè nè lùkàsà nè mwànyì mwònsò, kàdì nciyì nteeta bwà kutùpika eyi to. Kàdì nèngàalukilè buludì cyànyimà bwà kuyàngata cyàkàbìdì mu dyàlumingu dilwalwà edì (bu Mukalenge mwà kwanyisha) nè kupicishila díbà dyàbúngì pa yôyì.

<sup>206</sup> Kàdì, tàngilàayi mpindyewu, yèyè wàkamòna ntengu yònsò yìnaayi yà buloba, nè banjèlò biimàne ku ntengu yìnaayi yà buloba. Mpindyewu, wèwè udi wamba nè: “Pàànyì’s mwà ngèèla meeji nè bùvwa bùvungàmàne”; aci kacyèna cìbùpangisha bwà kwikalabù nè ntengu yìnaayi to, nudi numòna’s. Èyo.

<sup>207</sup> Mpindyewu: “Mu ntengu yìnaayi yà buloba, bakwàte mpeepèlè yìnaayi ayi.” Mu ngaakwilù mukwàbò, ke mpeepèlè yìyaayà eyi, yìtuuta mu mvità nè dikòkangana bìlwalwà pa buloba bujimà. Ndìbà kaayi dikaadiku aci kacya cyenzèke? Kacya too nè ku Mvità Yàkumpàlà Yà Buloba Bujimà. “Bakwàte mpeepèlè,” nè bàvwa munkaci mwà kulwangana, bàbwela bwà kucìmuna.

<sup>208</sup> Nènku mpindyewu, ke Mukwàbò ulwàlwa ewu. Mpindyewu, bu nwènu mwà kutàngila nè kwosha dísu kùdì Mwanjèlò awu, yèyè’s m’Mwanjèlò umweumwe wàkapàtuka mu Yèhezèkèlè 9 awu, pàakafùminà bantu abu paanyimà pàà biibi byàbò nè byamù byà dishebeyangana naabi abi nè bàvwa bàpicila mu Yelusàlèma bwà kushebeya beena Yudà. Nudi bavùlùke anyì? Yèyè nè: “Indìlaayi! Indìlaayi! Cìmànyikaayi, too nè panwàpicilà mu cimenga nè kutwà cimanyinu pa mpàla yònsò udi upùma nè ùdila mwadi bwà binyangu byàkenjiibwa mu cimenga.” Ncyà bushùwà anyì?

<sup>209</sup> Pashiishe, paanyimà pàà Yèyè mumanè kwenza nànkù, ke Yèyè kubàbweja nè kushipabò. Aci’s cìvwa ndikèngeshiibwa dyà kùdì Tiiitùs. Mpindyewu, nudi numòna’s, yèyè m’Mwanjèlò umweumwe awu, mupàtùke cyàkàbìdì, ùfùmina ku Esètè (nè kwikalà Yesù mwà kulwila aku) nè Yèyè nguwwa nè Cìtampì cyà Nzambì udi nè Mwoyi. Butùmbi’s wè!

<sup>210</sup> Mpindyewu, Cìtampì cyà Nzambì udi nè Mwoyi ncinyì? Kaa, aci cyòcì kaciyì dikokangana dinène pa buloba leelù ewu’s wè! Bàmwè bàdi bàmba nè nkuneemekela kwà ditùkù dyà nsabatu, nè bàmwè bàdi bàmba nè mbwà dyenza dyà *cikampàndà* nè *cikansanga*. Kàdì Bible mmwambè nè “Nyumà Mwímpè ke Cìtampì cyà Nzambì!” Efèsò 4.30 ùdì wamba nè: “Kanùbungamiji Nyumà Mwímpè wa Nzambì unùdì batwibwe nendè cìtampì too nè ku ditùkù dyà bupikudi bwènu.” Nwamònu anyì? Èyo. N’Nyumà Mwímpè.

211 Dìbà adi cìdì cilwè ncinyi? Mpindyewu, tàngilàayi! Kaa, pândi ngèlèla meeji ku eci, mwoyi wànyì wùdi wùtùpika. Mpindyewu Yèyè wàkamba nè: “Lamàayi mpeepèlè yìnaayi ayi too nè” (mu ngaakwilù mukwàbò) “patùdi tutwà basadidi bàà Nzambì wetù citampì pa mpàla pààbò.” *Basadidi* abu, “beena Yudà.” (Yone kukùdimukayè, kwamba nè: “Mémè kumòna bantu binunu lukàmà nè makùmi ànaayi nè binaayi batwìbwe citampì.”) Mpindyewu, mpeepèlè yònsò yàkabanga kutuuta, nè nùnkù’s mbàbwikidije buloba nè mvità yà Haamàgidòna yìvwa mifwànyìne kwenzeka mu Mvità yà Kumpàlà yà Buloba bujimà, kàdi. . .

212 Mpindyewu bìkèngela ngàngatè mukwàbò Mufùndu kaaba aka bwà kunùleja. Yesù wàkaakula bwà bantu bàvwà. . . Yèyè kwamba nè: “Bàmwè bààkalwa pa dībà kampàndà, nè bakwàbò pa dībà dikwàbò, nè bàvwa bantu bàà dībà dyà dikùmi nè ùmwè. Bantu bàà dībà dyà dikùmi nè ùmwè.” Mpindyewu, nwènu bàdi bàà nyumà badilaayi munkaci mwà milongo, bwalu bìdi bìkèngela bwà mémè kutùpika apa nè kulwijakaja. Mpindyewu, tàngilàayi. “Bwelàayi, bantu bàà dībà dyà dikùmi nè ùmwè abu.” Nènkù ànu mpindyewu mene. . . “Bàà kumpàlà bààkabwela è kwangatabò dyeyà dimwè, nè bààkalondà bààkabwela è kwangatabò dyeyà dimwè, nè bantu bàà dībà dikùmi nè ùmwè bààkapeta dyeyà dimwèdimwè dyàkapetàbo musangu wà kumpàlà adi.” Ncyà bushùwà anyi? Pa dībà dikùmi nè ùmwè!

213 Mpindyewu, tàngilàayi, mwena Yudà ndikunji dilleji ntàntà, tudi twenda tumulonda mpindyewu. Mpindyewu, pààkalwà Mvità yà Kumpàlà yà Buloba bujimà, yàkangata mwena Yudà yònsò, bààkatangalaka mu matùnga ònsò. Bu mùvwà Mufùndu wà kumpàlà wùvwà mukonkìibwe leelù ewu, mùvwàYe mwà kubàtangalaja mu matùnga ònsò, s’ki bôbò bônsò abu. Kàdi ke mpeepèlè yìlwalwà eyi yìbwela mu Yelusàlèmà, myaba yònsò, mvità yà buloba bujimà.

214 Ke Yèyè nè: “Indilaayi! Yimànyikaayi, too nè patwàtwà basadidi bàà Nzambì wetù citampì.” Mu ngaakwilù mukwàbò nè: “Tudi tulwa naabò munwemu bàfùmina mu matùnga ònsò, myaba yònsò, tulwa naabò bwalu tudi nè cyà kubàbweja ànu mpindyewu mwab’ewu bwà kutwà binunu lukàmà makùmi ànaayi nè binaayi abo citampì. Imànyikaayi cyòci aci!”

215 Nènkù Mvità yà Buloba bujimà yà Kumpàlà ayi yàkiimana mu ngondo wa dikùmi nè umwe wa cidimu aci, ditùkù dyà dikùmi nè dimwè mu ngondo awu, dībà dyà dikùmi nè dimwè mu ditùkù adi, òvwà bantu bàà dībà dyà dikùmi nè umwe mwà kubwela adi. Dìbìikila dyà ndekeelu bwà mwena Yudà! Nè yèyè neàpetè dibàtiiza dimwèdimwè dyà Nyumà Mwimpè adi dyàkapetabò kale wàwa ku cibangidilu ku Mpenta adi, kubàtìijibwa mùshindù wùmwèwùmwè awu, nè bikwàbò byònsò, bantu bàà dībà dyà dikùmi nè ùmwè abu munkaci mwà kubwela.

216 Yèyè nè: “Cimànyikààyi, mpindyewu, too nè patwikala batwè citampì.”

“Too nè dibà kaayi diWashààla mucikwàte?”

217 “Too nè patwàtwà basadidi bàà Nzambi wetù citampì. Mpindyewu, tudì—tudi munkaci mwà kutwà Bisàmbà byà bendè citampì, mbatwìbwe citampì, binunu misangu binunu bìdi bìpìcila mu dikèngeshiibwa nè makènga aa, mbatwìbwe citampì. Kàdi anjì indilaayi kakesè! Anjì indilaayi kakesè! Kanùlekedikù dikèng-. . . Kanùlekedikù cikondo cilwa to too nè patwàtwà basadidi aba citampì to.” Ke kutwàyè binunu lukàmà nè makùmi ànaayi nè binaayi abi citampì.

218 Pashiishe kulekelelabò mpeepèlè ayi cyàkàbìdi. Mpindyewu, mònaayi’s, nè kacya ànu ku Mvità yà Kumpàlà yà Buloba bujimà kwàkalwa dikèngeshiibwa bwà kulwisha beena Yudà. Kujjuukakù Hitler bwà Mvità Mii bìdi yà Buloba bujimà, nè pààkenzàye nànkù, wàkabanga ku. . . Cinyi? Yèyè ùvwa nè cyà kusunsulula buloba bujimà ànu mu nyùngulukilu amu. Ncyà bushùwà anyi? Ùvwa nè cyà kubùsunsulula, nè ànu mu nyùngulwilu amu. Èyowà, ùvwa nè cyà kubùsunsulula.

219 Cintu cyònsò civwa nè cyà kwikala Communisme. Nudi bavùlùke cikondo civwàbo nè cyà kungela mu bùlokò mùnwemu emu anyi? Mwva nyiisha cintu cimwècimwè eci munwemu mu Redman’s Hall dilòòlò adi. Èyowà’s, mukalenge. Ngàmba nè: “Nekwikalè tusumbu túsàtù. Nè bôbô bônso bàvwa bafwànyine kudikùngwija mushikì mu kasumbù kàmwè, nè kasumbù aku nekáfikishè dikèngeshiibwa òvwa difwànyine kutùma cyàkàbìdi Yesù Kìlistò pa buloba.” Nènku ke mùdibi nànkù menemene. Nè civwa n’Communisme, nè—nè Hitler nè—nè Nazisme, nè bikwàbò; nè mùvwà Fascisme wa Mussolini, nè Hitler, nè Staline. Mémè kwamba nè: “Umwe wa kùdìbo neàngatè kaaba aku. Ncyèna mumanyè nè neikale nganyi to, kàdi ndi ngiitabuuja nè neikalè mfùmù wa ku Nord.” Cyà bushùwà menemene nudi bavùlùke bintu abi nè mùshindù wùvwà bintu abi bilongèshiibwe mwab’ewu; nè Mwanèètù Mahoney, nè nwènù bônso bàà kale abu, nudi bamanyè’s.

220 Ke kwambabò nè: “Wèwè muiishe aci. . .”

221 Nènku pa cintu cyà N.R.A. eci, mémè kwamba nè: “Aci kì ncimanyinu cyà nyama wa lwonji to, nànsha kakesè. Ndyenzejangana ku makàndà dyà ntèndeleele; kì ng’aci to.” Mémè nè: “Aci’s cidi ànu cidyanjididi bwà kufikisha bantu ku kudìlongolola, nè bamanyè bimpè nè mbangilu ewu, ànu mwab’ewu cidi mbangilu wa dibungama, ànu mwab’ewu ke wutùdi tutwàdija kubwelela. Ànu mwab’ewu ke pàdì—pàdì cikondo citwàdija kujika. Mpindyewu, mònaayi’s, dibà adi mu cikondo aci.”

222 Mpindyewu, dikèngeshiibwa kubùcikiladi beena Yudà, nènku bàakabanga kubàkèngeshila ku ditunga nè ku ditungà

dyónsò nè kubìipata buludì kubàbweja mu Yelusàlèrà. Ncyà bushùwà anyi? Muntu nè muntu, bàdi bàya mu bulelèlà. . . Nè Yèyè neàpetè binunu lukàmà nè makùmi ànaayi nè binaayi abi. Tàngilàayi apa kule ndambù mu Bwàkabuulwibwà mwaba wùdi Yone. . .

223 Mukalenge Bohanon Iwà kwínshì eku kungambilayè, kwamba nè: “Ncyèna mwà kubala Bwàkabuulwibwà abu to.” Yèyè nè: “Kùvwa Mukàji-musèla mwimàne pa Mukùnà wà Sinaayi.” Yèyè nè: “Kùvwa Mukàji-musèla mu Dyulu mwàmwa.” Ke yèyè nè: “Kùvwa Mukàji-musèla, nè màyi. . . dragon ùpwidija màyi mukana mwèndè bwà kuMwenza mvità.” Yèyè nè. . .

224 Mémè nè: “Mukalenge Bohanon, bwalu bùdiku bùdi nè, wèwè udi nè cintu cibi, ucibiikila nè ‘Mukàji-musèla.’” Mémè nè: “Beena Yudà nebiimanè pa Mukùnà wà Sinaayi, binunu lukàmà nè makùmi ànaayi nè binaayi abi. Mukàji-musèla yèyè, mu mùshindù mujaalàme, ùkaavwa mu Dyulu nè Yesù. Nè dragon wàkapwidija màyi mukana mwèndè awu neàlwangeshe *bàshààdilé* bàà Dimiinu dyà mukàji abu mvità.” Awu wùvwa musumbà wùdi mwab’ewu wùvwa nè cyà kupweka, kí ng’wàwà nàka to. Nwamònu anyi? *Bàshààdilé* bàà Dimiinu dyà mukàji abu, “èkèleeziyà mujidila awu,” kàyi mupepè Nyumà Mwímpè, ke bóbò bàakalwishàye mvità abu’s. Nwamònu anyi?

225 S’ki bóbò aba, kùdi bisàmbà bisàtù. Bilamàayi misangu yónsò ànu bisàtù abi mu meeji. Nènku *apa* yèyè kumòna, mu nyùngulukilu amu, binunu lukàmà nè makùmi ànaayi nè binaayi ebi mu nyùngulukilu wa Mukàji-musèla munène mupikula awu. *Bàshààdilé* aba mbàvwa *bàshààle*, ke bóbò abu’s, ke beena Yudà mbóbò abu, mwaba awu, batwibwe citampi, binunu lukàmà nè makùmi ànaayi nè binaayi abi. Aba ke bàdi bajidiibwe, bàakabènga bwà kupeta Nyumà Mwímpè abu. Èkèleeziyà neàkèngeshè kùdi. . . èkèleeziyà wa—wa beena Loomò nè bóbò abu nebàbàkèngeshè. Kàdi Mukàji-musèla ùkaadi mumanè kwambwibwa nè ùsanganyiibwa mu Dyulu. Ke bóbò abu’s, batèkèkiibwe ànu menemene mùdi Bible mwambè nè nebiikalè amu. Nwamònu anyi?

226 Pa nàнку binunu lukàmà nè makùmi ànaayi nè binaayi abi mbeena Yudà, basadidi bàà Nzambì. Nè pàdi Èvànjeeliyò wa Nyumà Mwímpè ùyiishiibwa kùdibo, nè bàdi bàpeta dibàtiiza dyà Nyumà Mwímpè ànu menemene mwàkenzabo ku cibangidilu amu, cipungu cyà bàà Bisàmbà byà bendè cyàjikì, Èkèleeziyà mmutwibwe citampì, Dyambwibwa didi dilwa.

227 Matùkù à bàà Bisàmbà byà bendè, Èvànjeeliyò mmuyiishiibwe myaba yónsò, mukòbolakobola munkaci mwà bàà Bisàmbà byà bendè, bàpulumuna bukòndò, bàteeta bwà kutùpula mushipa wónsò wùdi wùsanganyiibwa mu màyi bwà kubwelawu. Nènku bàtàngilaayi, batàmbe bunène abu. . . ? . . .

Bukòndò bònso bùvwa bwambùle nkùvu nè ntàndè yà mu màyi, nè bikwàbò. Pàdi ànu ditàbuluja nè dyàjiki èè bàdi bààlukila buludì cyàkàbìdì mu maalu à buloba. Mishipa yikaadi ànu bu mimana kwela ku nshinga. Nwámònu cìndi nswa kwamba anyi?

<sup>228</sup> Èvànjeeliyò ùkaadi muyiishìibwe! Kanùcyèna nuumvwa kàbìdì myadi to, kakùciyi kàbìdì ditwà dyà mikèmu, kakùciyi kàbìdì dipuma, didila bwà dibàtiiza dyà Nyumà Mwímpè nànsha. Mbaswè bwà kubwelamù, èyowà, bàdi bàbàtentekela nkàmà nè nkàmà byanza, nè bàdi bènza maalu à lukutukutu nè bàja maja, pàmwàpa, anyi cintu kampàndà cikwàbò cyà mùshindù awu. Abi's bìdi ànu bìmpè, kàdi abi bìdi ànu byambiibwà.

<sup>229</sup> Mupèrsonà ewu Kilistò Yesù ùdi ùpàtula cintu cilelèlè, nè ùshàala mulamè muntu awu mukùbiibwe mu Kilistò too nè pààlwàYe. S'ki Yèyè awu. Nènku mpindyewu, nènku ke bwà cinyi kakùcyèna kàbìdì mwadi to, biibi bikaadi byàmba kukàngiibwa. Bukòndò mbuyè, ànu bu musangu wàbò wà ndekeelu, nkushàala bakesè bàakukòka mùshindù awu bwà kubwelabò mu Bukalenge bwà Nzambi. Biibi bìdi munkaci mwà kukàngiibwa!

<sup>230</sup> Pashiishe cintu cidi cilondà ncinyi? Bidi bikèngela bwà beena Yudà kupetabò Nyumà Mwímpè nè kubàtiijibwabò mu Dìna dyà Yesù Kilistò. Ntàntà yònsò udibò ànu bânùkèngesha nè bânwèlulwila; nè, mwaba awu, nè pàdi ànu Nyumà Mwímpè muleejìibwe kùdibo, bàdi bàpeta dibàtiiza dyà Nyumà Mwímpè. Èkèleeziyà wa bàà Bisàmbà byà bendè mmwambwibwe. Nè aba bààkabèngà, nè kwendela ànu mu dibingishiibwa dyàbò, dragon (bukolè bwà beena Loomò abu) kupwìdijilayè màyi, cìikalà nè cyà kudisangisha pàmwè nè Communisme, nè kubweja èkèleeziyà mu dikèngeshiibwa dyà mùshindù awu. S'ki bóbò abu baleejìibwe ànu mu cimfwànyì menemene.

<sup>231</sup> Kaa mwanèètù, patùdi tucimòna cilwa, ke bwà cinyi ndi nsambila, ke bwà cinyi ndi ngèèla mbilà kùdi Nzambi nè: “Mukalenge, ndi muswè kufika kùdi beena Yudà abu. Ndekèlaayi ntwadijilèku lwà mu Àfrikè mwàmwa, nkwàta mudimu nè ndambu wa bàà Bisàmbà byà bendè nè ba-Mùzùlùmanyi abu. Nènku ndekèlaayi nye mu Ìnde emu nè nteetè bwà kupàtula patòoke nè kubàleeja Mukalenge Yesù Kilistò mulelèlè nè makolè Èndè, Bishimà Byèndè, Dibàtiiza Dyèndè, bintu byònsò, nè Nyumà Mwímpè.” Pashiishe pààfikàbo ku Yelusàlèma . . .

<sup>232</sup> Mwanèètù wa balùme Beeler, eci ke cinùvwà munkaci mwà kukonka. Pààfikàbo ku Yelusàlèma nè kwimana mwaba awu, è kwamba nè: “Mpindyewu, pìikalàbi nè Yesù m'Mwànà wa Nzambi wàkabiika ku bafwè awu, Yèyè mmumanyè maalu ànu mwàkenzàYe kwàka ku cibangidilu amu, Yèyè udi mwà kupàtula Mwoyi wùmfwèwùmfwè wàkapàtulàYe kale wàwa awu. Nè Yèyè

mwenzè nànkù, nèMwitàbè bu Musùngidi webè sungasunga anyi?” Nè pashìishe kuleeja nè Nzambi ku makolè Èndè manène nè bintu byà bukolè Bwèndè bubìishìibwe ku lufù abu, Yèyè ùdi neetù.

<sup>233</sup> Dìbà adi pàdìbo bènza nànkù, bàmba nè: “Mpindiyewu, nwènù bàdi baMwakidile bu Musùngidi wenù sungasunga abu...” Ndi ntèkemena nè nekwikalè binunu byà bantu. Kwamba nè: “Nyumà Mwímpè umweumwe wákamata mu Ditùkù dyà Mpenta awu ùdi kaaba aka mene bwèbè wèwè.”

<sup>234</sup> Dìbà adi Èvànjeeliyò ùdi wàlukila kùdi beena Yudà ànu mwaba awu mene mu cikondo aci. Pashìishe nekwènzekè ditàbuluja munkaci mwà beena Yudà abu mwaba awu mene diikalà mwà kutwàla binunu nè binunu makùmi nè. . .binunu lukàmà nè makùmi ànaayi nè binaayi, mu Bukalenge bwà Nzambi, nebàtwibwè citampì kùdi Mwanjèlò mutwànganyi wa citampì awu.

<sup>235</sup> Ndi mutwìshìibwe nè Yèyè neáfuminè ku Esètè. Ke kùdiYe ùfumina bitàngilàngàne nè mwaba wutùdi mpindiyewu, nè citampì Cyèndè mu cyanza Cyèndè. Dìbà adi, kaa, ndi muswè kwikala musangìshìibwe mwómò amu. “Ndi mutùme dikèngeshiibwa apa nè dikèngeshiibwa pàapa, nè ndi munyemèshe beena Yudà lùbilu nè mubàsàke nè Mwànyì mwònsò. Kàdi mbiipàcìbwe nè bapingànemu. Beena Yudà bààbùngì mu Ètats-Unis (kabààkupàndukakù to) bàkaadi bamanè kupeta Nyumà Mwímpè. Kàdi nkàadi nè binunu lukàmà nè makùmi ànaayi nè binaayi byònsò abi biimàne mwaba awu bìikalà mwà kwakidila dibàtiiza dyà Nyumà Mwímpè.”

<sup>236</sup> Nènku ànu mwaba awu, pàdi ànu Mwanjèlò mutwànganyi wa citampì awu ùbanga kutwà binunu lukàmà nè makùmi ànaayi nè binaayi abi citampì, ciibi cyà Èkèleeziyà wa bàà Bisàmbà byà bendè ncikànga, nè beena Yudà bàdi bàtwàla Nyumà Mwímpè kùdi beena Yudà. Nè nebàpetà ditàbuluja dyatangalakà buloba bujimà. Àlèluuyàh! Nènku bukolè bwà Nzambi nebùmweneshiibwè munkaci mwà beena Yudà. Kaa, mùshindù mwinè wùdibi bilenga’s wè! Yoyòyò! Kaa, ekèlekèle!

<sup>237</sup> Ngǎnji mmonèbi’s, lùkàsàlùkàsà nè: “Yeshàayi.” Twandàmunyi lwà nè “bànà bàà Nzambi” alu. Mpindiyewu tùmònààyiibi:

### **Izàlèlèlè ùdi. . . ?**

<sup>238</sup> Tùmònèbi ní udi mwà kuçbala, mwanèètù. Ndi. . .Cìvwa cyenzè bu cilamàkàne pàmwè, mmucikùpùle ndambù wa misangu; Nènku nèngìikalè ngènda nkèba lukwàbò. Bu nwènù mwà kuswà, bu nwènù mwà kuswà. [Mwanèètù Neville ùdi ùbala lukonko alu—Muf.]

**14. [Dyumuwiya dyà Yeshàayi dyà “difulà dyà myelè yà mvità kuyènza nkàsù” kadyèna dyènzeka mu bukòkeshi bwà**

**bidimu cinunu bwà Kilistò, kacyi cintu kampàndà cidì muntu mwà kutwàla, bu mùdi beena ntèndeleeù bààbúngi menemene bàà cyeena leelù bàtwàmbila amu anyi?]**

239 Nànsha wêwè mwikàle nganyi, mwanèètù wa balùme anyi wa bakàji munanga, mbimwèke ànu bu nè ncyanza cyà muntu mulùme, kàdi, nànsha bìshi, nànsha wêwè mwikàle nganyi, udi mubîngè menemene! Ke cikondo cyàfùlàbo nkàsu, anyi, cikondo cyàtuutàbo myelè yà mvità bwà kuyifùla nkàsu. Aci's necìpatulè Bukòòkeshi bwà Bukalenge bwà bidimu cinunu. Nè tusùmbù twònsò twà ntèndeleeù twà cyena leelù tùdi tùtwa eku nè eku tùtèeta bwà kulongesha bantu kubàbweja mu Bukalenge bwà Nzambi atu... Ki pìikalà Nzambi Yèyè mwinè mwà kulwa mu Kampàndà mutàmbe-mfùkìlu nè mu Bukolè butàmbe-mfùkìlu, kùdi cisàmbà cidì cìtabuuja citàmbe-mfùkìlu, nè nebàpetè Bukolè butàmbe-mfùkìlu bwikalà mwà kufwimba bânà bàà Nzambi. Àlèluuyàh! Kacyàkwikala kàbìdì dibala, difùnda, makùmi, necìikalè ku bukolè bwà dibìikà dyà ku lufù dyà Yesù Kilistò. Dìbà adi bàà pa buloba kabààkulonga kàbìdì mvità to.

240 Ditùnga nè ditùnga dyònsò leelù ewu, bukolè bwònsò, bukalenge bwònsò, mbukòntònyìibwe kùdi dyabùlù. Bible ngudi mwambè nànkù. Nè dimwè dyà ku matùkù aa bukalenge bwà buloba ebu nebùlwe makalenge à Mukalenge wetù nè à Kilistò Wendè, nè Yèyè neàlombolè nè neàkòòkeshè bidimu cinunu pa buloba; nè neàmbulè Èkèleeziyà. Menemene, aci's ncyà bushùwà menemene, mubadi munanga.

241 Binunu lukàmà nè makùmi ànaayi nè binaayi mbasadidi. Musùmbà munène wùdi muntu nànsha umwe kàyìku mwà... "Misùmbà yà bantu yìdi muntu nànsha umwe kàyìku mwà kubala," abu mbàà Bisàmbà byà bendè.

242 Anji indilaayi katanci mpindyewu, kàmwè kantu kàà kutenteka pa cyòci aci. Ncyèna mwà kwenza nànkù to. Nèngenzè ànu disambila bwà disangisha dijimà dìbà adi, mu tusunsa tukesè emu. Tàngilàayi kùnweku, ngèèla meeji nè Eci ncìdì nè mushinga wàbúngi mpindyewu mene. Ndi muswè kusambidila babèèdì, kàdi netùlwìjakajè. Pamutù pàà kwenza dijingulula, netùcìjikìjè ànu buludì. Ndi muswè nnùkonkèku cintu kampàndà. Lukwàbò ndwòlò elu mene. Nebikèngelè ànu bwà mêmè kwangata elu bwà kulwàngata mu dyàlumingu dilwalwà edi, ngèèla meeji.

243 Tàngilàayi, balundà bàanyi, pa lwòlù elu, bilenga kaayi's wè! Tàngilàayi! Ndi muswè bwà nwènù kutàngila mpindyewu, nè ntèmà yònsò, muntu udi mwelè lukonko elu awu. Binunu lukàmà nè makùmi ànaayi nè binaayi abi, mpindyewu, abu mbasadidi, nebàsadilè. Nwènù bamòne, bilondèshile myaba, mu Mifundu yà kale ayi... .

244 Ikàlaayi nutàngila misangu yònsò ku mundidìmbi panwikalà baswè kumòna cidi cintu cilelèlà aci. Ncyà bushùwà. Tàngilàayi dyàmwàmwa, nùmonè cidìci. Mpindyewu, bìdi ànu cyanza mwandamuna kutwàdijila ku Nkùrusè, nè nùmonè cidi cintu cilelèlà aci panwikalà baswè kumòna cidi mundidìmbi awu. Kuntu kwàka, bivwa bìlumbila ku Nkùrusè, tuvwa nè cyà kutàngila (paanyimà pààpa), bwà kumòna mundidìmbi, bwà kumòna cìvwà Nkùrusè nè cyà kwikala; mpindyewu nudi nè cyà kutàngidila ku Nkùrusè, bwà kutàngila paanyimà bwà kumòna cidi mundidìmbi. Nwamònu anyi? Tàngilàayi nùmonè cìvwà Kilistò mu matùkù à pàvwàYe pànu pa buloba, cìvwàYe musangu awu aci ncìdiYe mpindyewu. Eci ke mundidìmbi Wèndè. Nudi bamòne cìndi njinga kwamba aci anyi? Nudi bamanyè's, ku cibangidilu pangàakacyùmvwijà, ke cidìci. Mpindyewu, mémè mutàngile kuumukila paanyimà pààpa, ndi nè cyà kutàngila cìvwà mundidìmbi bwà kujandula ciikalà eci nùnkù, cìvwà Nkùrusè.

245 Mpindyewu, dîngà ditùkù kùvwà mpèkaatù mu Izalèlèlà, nè kùvwà muntu. . . ku cisàmbà cyà dîna dyà Lewi. Kukòkabò myelè yàbò yà mvità nè kuyabò nè Mòsà too nè ku citùùdilu, kàdi kubùtulabò byònsò bivwa mpèkaatù abi. Ncyà bushùwà anyi? Nzambi wàkapwekesha mèsù è kwamba nè: “Bwalu udi mwenzè cyòci eci nè mutwè ku Cyànyì, yènu. . . bakwàbò bònsò aba nebàkusadilè. Nènku nudi nubwela buludi mu ntempèlù bu baakwidi.” Ncyà bushùwà anyi? “Shààlaayi nwènu ànu mu ntempèlù emu, nè bakwàbò bàà kùdìbo nebàkwatè mudimu nè nebàtwalè cyàdikùmi nè kunùcyùka.” Mmómò anyi?

246 Kaa, àlèluuyàh! Bu nwènu mwà kumòna cìvwà ntempèlù awu, cyà nè beena Lewi bàvwà Mukàjì-musèla. Mpindyewu, pàdi mpèkaatù utàbuluka ku nseke yònsò, beena Lewi bàdi bàlòpola myelè yàbò yà mvità. Mukàjì-musèla mulela kùdi Nyumà Mwimpè mmwimàne pambèlu apu, wàmba nè: “Yesù Kilistò mu cintu cilelèlà n'Yesù Kilistò mu ciibùlòjì, ànu mùshindù wùmfwèwùmfwè awu. Mpèkaatù ùcidi ànu mpèkaatù, mbibi bwà kwenza bintu ebi!” Ncyà bushùwà, mbiimàne mwaba awu nè Mwelè wà mvità.

247 Nzambi ùdi wàmba nè: “Lwâyì mpindyewu, babèneshiibwe bàà Taatù Wanyì.” Ke Mukàjì-musèla nyàwù.

248 Ke basadidi mbòbò abu, nè tàngilàayi mwaba wùvwà basadidi bààsa bitùùdilu. Dikùmi nè bibidì elu luseke. . . Ndi muswè kwamba nè, binaayi *elu* luseke, binaayi ku *lwàlwa* luseke, binaayi ku *lwàlwa* luseke, nè binaayi ku *lwàlwa* luseke; bisàmbà dikùmi nè bibidì. Bisàmbà dikùmi nè bibidì abi ke binunu lukàmà nè makùmi ànaayi nè binaayi. Tàngilàayi mu Mukàndà wà Bwàkabuulwibwà, wàkamòna Cimenga aci nè bishimikidi byàci dikùmi nè bibidì. Ku ciibi cyònsò kùvwà dîna dyà mùpostòlò, nè biibi dikùmi nè bibidì. Nè mu nyùngulukilu wabi

amu mùvwa bisàmbà dikùmi nè bibìdi, (àlèluuyàh!), bisòmbe binyùngùlùke.

<sup>249</sup> Nè munda amu mùvwa Bapikula. Àlèluuyàh! Bafiike, batòòke, bàà kàlaabi, bafiikùlùke, nè bònsò bàdi basukula mu Mashi abu nebiikalè basadidi Bèndè, Yèyè mmwambè nè nebiikalè Nendè. Nebiikalè. . . Dìbà kadyàkubwòsha to nànsha kakesè, kabàakumvwa kàbìdi nzala anyi nyòòtà to, kàbìdi mu Cikondo cinène cìdi kacyi nè ndekeelu ke mwàsòmbelàbo nè kukòòkesha nè Kilistò bwà kashidi: Yèyè, Mfùmù; nè bôbò, Mukalenge-mukàji. Nèbàlombòle nè nebàkòòkeshè bwà kashidi!

<sup>250</sup> Mukalenge ànùbènèshè. Amen. Nènshaalè mulamè eyi; bu Nzambì mwà kwanyisha, nèngàalukilè naayi cyàkàbìdi, pàmwàpa dilòòlò edi, nè kuyàndamuna dilòòlò edi anyi dìbà kanà dyònsò dìdi Mwanèètù. . . netùdisangìshè nè netùyiikilè. Mukalenge ànùbènèshè. Nudi baMunangè nè mwoyi wènu wònsò anyi?

Kaa, ndi muswè kuMumòna, muswè kutàngila  
kwisù Kwèndè,  
Bwà kwikalakù nè mwoyi kashidi ku ngàsà  
Wèndè udi usungila awu;  
Mu mìsèèsù yà Butùmbi lekèlè mbàndishè díyi  
dyànyi;  
Pààpità ntàtù yònsò, netùfikè kumbèlu ku  
ndekeelu, bwà kucyònkomoka kashidi. (Kaa,  
ekèlekèle!)

Pàndi ngèza lwendu mpicila mu buloba ebu,  
ngènda ngimba pàndi ngènda nya apu,  
Mfunkwina misùukà ku Kàlvariyò, ku musùlù  
wà mashi, (Kakùyì—kakùyì ku èkèleeziyà to;  
ku Kàlvariyò.)

<sup>251</sup> Ke kutùdi munkaci mwà kufunkuna; kakùyì ku tèlòlòjì kampàndà to, kàdi ku musùlù wà mashi, kùdi Yesù Kilistò. “Mwoyi wùdi mu mashi,” nè Yèyè ùdi Mashi à Nzambì àdi Mwoyi wètù wùdi nè mwoyi munda mwètù mpindyewu. Mwonjì wùdi wùtùswikakajà ùbèneshiibwè!

<sup>252</sup> Pàtùkaadi twamba kusambidila babèèdi apa, ndi muswè dyèsè dyà—dyà pabwàdi mpindyewu. Ndi muswè bwà Mwanèètù wa bakàji Gertie nè mwanèndè wa bakàji, bu bôbò mwà kuswà, bwà kulwa mwab’ewu. Nènku ewu mmusambu mukùnà ku dikàsà wà kale, ndi muswè bwà nùwùngimbilè, *Itàbuujà Nàka*. Ndi mvùluka nè, mvwa ngènda mbwela mu ciibi aci, nè musambu ewu wùtu mundondè paanyimà mu matùngà ònsò. Nènku ndi—ndi muswè bwà bàwimbè, yèyè nguvwa muntu wakumpàlà bwà kuwimbayè, musangu wàkumpàlà wungàakawùmwà. Mulundà wanyi kampàndà ngwàkawùfùnda, Paul Rader. Nènku, kumpàlà kwà twètù

kusambidila babèèdi, ndi muswè bwà bàwîmbè pàdi mabènesha à Nzambi ikila pa bantu bwà babèèdi apa.

<sup>253</sup> Tudi bangàte díbà dyàbúngì. Wámfwilakù luse, Mwanèètù Neville. Nzambi ànùbènéshè. Nudi banangè nkonko anyì? Ndi muyinangè. Kaa, nè yôyi's yìvwa yà mîmpè bè, yìvwa ànu mîmpè mitàmbe. Nènku kùdi ànu mushiki mukwàbò. Nènku, mu bushùwà bwà bwalu, yìmwè yà ku yôyi kí mbànji kuyilenga nànsha, kaa, kùdi yàbúngì menemene yà kulenga. Mukalenge ànùbènéshè.

<sup>254</sup> Nwènù bônso lamàayi meeji ènù pa Kilstò mpindyewu, nènku tùshintululàayi tùmukè ku nkonko twàlukilàayi ku dyondopa dyà kùdi Nzambi. Mbanganyì bàdi kaaba aka bwà kubàsambidila? Tùmonàayibi byanza byènù, bàdi baswè bwà kubàsambidilabò. Èyo, netùlwe naabò kumpàlà eku bwà kubàsambidila ànu mu katanci kakesè emu, dyàkàmwè ànu pàdi bânà bèètù bàà bakàji bimba musambu mulenga ewu apa. Pàcidibo bàdilongolola apa, Mulayi ke wùdi mulembèlèle kumutù kwènù mpindyewu, eci ke Bible Wendè.

[Mwanèètù wa bakàji Gertie nè mwanèndè wa bakàji bàdi bimba *Itàbùùjà Nàka—Muf.*]

Itàbùùjà nàka, ànu . . .

<sup>255</sup> Mpindyewu, nwènù bàdi bàsaamà, seemènaayi nùnyungulukilè cyoshelu mpindyewu, bu nwènù mwà kuswà.

Bintu byònsò bìdi mwà kwenzeka, itàbùùjà  
nàka;  
Itàbùùjà nàka, itàbùùjà nàka,  
Bintu byònsò bìdi mwà kwenzeka, itàbùùjà  
nàka.

<sup>256</sup> Mpindyewu, Taatù wa mu Dyulu, tudi nè kusàkidila kwàbúngì leelù ewu bwà Mufùndu ewu nè bwà musambu ewu nè: “Itàbùùjà ànu nàka.” Tudi mwà kuKuumvwa wambila taatù uvwa nè mwànà wa balùme nè ciseki awu nè: “Itàbùùjà ànu nàka, bwalu bintu byònsò bìdi mwà kwenzeka.”

<sup>257</sup> Mpindyewu, tudi tulòmba, Nzambi, pàdi bantu aba bàlwa ku cyoshelu bwà kubàsambidila apa, bu mùdìbi nè tudi kaaba aka, ciibùlòji, ànu ciibùlòji cyanàànà; cintu cilelèlà cidi ànu pawîpi neetù, Nyumà udi kàyi ùfwa uvwa pambidi pèètù awu kàadyàkufwàku to. Nebiikalè nànu kupicila mu bikondo byònsò bìdi kabìyi bìjika. Nènku tudi tuya batàngile kumpàlà mpindyewu bu basadidi Bèèbè beela maanyi, bwà kukwàcishakù mukwètù bwà kwakidilayè dikwàcisha, bwà kiipàcilà ànu kàmwèpelè cyanàànà, Taatù, mbwà bôbò bààfwànyina kuKutùmbisha. Nènku mpindyewu swàkù bwà muntu nè muntu udi mwimàne ku cyoshelu eku mu dindà emu, babèèdi, bàsaama, mpindyewu swàkù bwà Nyumà Mwîmpè àfile dyondopa kùdi yònsò wa kùdìbo.

258 Nè twètù bu kasumbù Kèèbè kakesè—kakesè kàà mikòòkò, kàvwà bânà bèètù bàà bakàji bafuma ku dimba aku nè: “Kanùcìnyi to, nwènù kasumbù kakesè kàà mikòòkò,” tudi bamanyè, Mukalenge nè, ndiswa Dyèbè dimpè bwà kufila Bukalenge kùdì bóbò abu. Kàdi’s tudi bamanyè nè Wèwè utu misangu yònsò ànu pabwipi, bwalu Wèwè wakamba nè: “Mwaba wònsò wùdì bàbìdì anyi bàsàtù mwà kudisangisha mu Dìná Dyànyi, Nèngiikalè munkaci mwàbò. Nè cyònsò cidibo bàlòmba aci, mémè nèmbàpèèshèci.”

259 Mpindyewu, bilondèshile Dìyi dyà Nzambi didi kadiyi mwà kupangilakù, Dìyi dyà Nzambi, pèèshakù muntu nè muntu dyondopa, Mukalenge. Nènku’s mbiimàne kaaba aka, bindile. Patùdì tuya bwà kulaaba maanyi nè kubàtentekela byanza pambidi apa, nè kulòmba bwà disungidiibwa, swàkù bwà yònsò wa kùdìbo àye ku nkwasà wendè, bàalukila ku mààbò, bènda bàKutumbisha, mùdibi bìkèngela, mu mùshindù mupwàngàne, nè basàngàle. Nènku kwalukila cyàkàbìdì dilòlò edì, Mukalenge, ku disangisha, bàfila butùmbi nè luumù kùdì Nzambi bwà dyondopiibwa dyàbò. Enzàku nàнку, Mukalenge.

Nènku patùcìdì nè mitù yètù miinyika apa:

260 Mwanèètù Neville, lwàkù naanyi, bu wèwè mwà kuswà. Ndi muswè bwà Mwanèètù Fleeman, nè Mwanèètù Deitzman, anyi muntu kampàndà mwab’ewu, nè Mwanèètù Cox, nwènù bònsò lwàyi apa nùnkwàcishèku ku cyoshelu. Balami bàà mu èkèleeziyà emu ke bāndi mémè mbiikila mpindyewu mene.

261 Nènku patùdì tubàsambidila apa, nudi mwà kubàmbulwisha panwikalà baswè. Ndi—ndi muswè bwà muntu nè muntu udi mwab’ewu ikalè nè meeji matòòke menemene. Nènku patùdì tusambidila babèèdì apa, ndi muswè bwà nùsambilèku neetù.

262 Ndi mmòna mwànà wa balùme mutekète musòmbe paanyimà pààpa mpindyewu, uvwa mupàtùke mu cibambalu mwàmwa kùkaadi katancì nè uvwa nè mashi àlwa munda. Kàdi Mukalenge Yesù ke kwimanyika Yè ditùnkumuka dyà mashi adi mu mùshindù wà ùkèmeshà ànu mpindyewu. Nwamònu anyi? Luse Lwèndè lùtùmbishiibwè, Dìná Dyèndè dìpèebwè buneeme. Mònaayi ànu bùngì bùvwà bwondòpiibwe ànu mu matùkù makesè mashàale emu’s!

263 Anji elààyibi ànu meeji, Mukalenge Yesù mwinè uvwa kuntu kwàka mu matùkù à bàpostòlò awu ùdì kaaba aka mene mpindyewu. Nènku cyòcì eci cidì munkaci mwà kutwisha cikondo cyà bàà Bisàmbà byà bendè ku ndekeelu. Nkwaka munène mmudìtwe mu dyenzeka munkaci mwà beena kwitabuuja bàà batàmbe-mfùkilu, bwalu tudi twitabuuja nè Nzambi ùdì kaaba aka.


264 Anji elààyibi ànu meeji, mubidi wèbè—wèbè mutùmbishiibwe awu wùdì kaaba aka mene mu tabernacle emu mpindyewu, Bwikadi bwà Nyumà Mwimpè *budi* ngiikadilù

webè mutumbishiibwe awu abu. Udi mutumbishiibwe mu Kilistò mpindyewu mene's! "Aba bàdiYè mubingishe, Yèyè wàkabàtumbisha." Nè mubidi webè sungasunga mutumbishiibwe awu mmwimàne pabwipi neebè mpindyewu mene, mu Kilistò Yesù, bwà kukupèèsha dikàndà bu mudilu wùdi wùbwela mu dibwe dyà nzembu amu. Nyumà Mwimpè ùdi munda mwèbè. Mbwa kubweja mu mubidi webè bwà kukupèèsha dikàndà dipyadipyà, bwà kukwondopa ku disaamà dyùdi naadi, bwà kukusàngaja.

<sup>265</sup> Mpindyewu, ndi muswè èkèleeziyà, bu bôbò mwà kuswà, nè bânà bèètù bàà bakàji, bu bôbò mwà kwimba cyakàbidi musambu awu ônsò. Mpindyewu, yônsò wa kunùdi udi ku cyoshelu. . .

<sup>266</sup> Mpindyewu, balundà bàanyi, pangikala mèmè museeswishanganyi, ndi mupangi wa bwalu abu. Ndi nteeta bwà kwikala mwena Kilistò, nè mwoyi wanyi wônsò ndi nteeta bwà kukwàcisha bantu. Nèku ndi nteeta bwà kunùkwàcisha, nwènu bânà bàà Nzambi. Nèku mèmè—mèmè munange Taatù wanyi wa mu Dyulu, nènùnangè nwènu, bânà Bèndè. Pangikala nciyi. . . Pangikala nùshima nwènu, ndi nteeta kushima Nzambi, nwènu nudi bânà Bèndè; muntu nànsha umwe kêna mwà kushima Nzambi to. Ndi nteeta bwà kunùkwàcisha.

<sup>267</sup> Ke bwà cinyi Nzambi ùdi ùbènesha didifila dyanyi. Nèku pàmwàpa ndishààdile bikolè, nè ndi ngùmvwa bundù bwà didifila dyanyi misangu mikwàbò, nè Nzambi mmùmanyè nè ndi ndyùmvwa bundù nè mwikàle nyingalala bwà didifila dyanyi. Kàdi ndi ngèza cyônsò cindi mwà kwenza aci bwà kukwàcisha Bukalenge bwà Nzambi nè kunùkwàcisha nwènu bânà Bèndè. Akidilàku Yesù mu dindà emu bu Mwondopi webè, ànu pa cibumbà cyà ku cyambilu apa, nenwàlukilè ku nkwasa yènu aku nè ku mènù aku bwà kwikala mwènu nè kale nè basàngàle.

<sup>268</sup> Mpindyewu, Yèyè mwà kwondopa nkàmà yà bantu mwab'ewu, nè binunu nè binunu byà bantu pa buloba bujimà, mbwa cinyi bùdiYe kàyì mufwànyine kukwondopa wèwè? Itàbùùjaayi ànu nàka. Eyo, nwènu bânà bèètù bàà bakàji. Mwanèètù Neville, ndi muswè ùlwe bwà kubàlaaba maanyi. [Mwanèètù Branham ùdi ùsambidila babèèdi, mèyi èndè kaèna ùmvwika bimpè to—Muf.] . . . ? . . . 

54-0103M Nkonko Nè Mandamuna #1  
Branham Tabernacle  
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)